

四庫全書

經部

欽定四庫全書

春秋地名攷畧卷三

詹事府詹事高士奇撰

齊

國於臨淄

史記呂尚東海上人其先祖嘗為四嶽虞夏間封于呂本姓姜氏從其封姓周西伯

獵過於渭水之陽與語大說曰吾太公望子父矣故號之曰太公望文王崩武王伐紂曰師尚父武王已平商而王天下封師尚父于齊營丘此齊國始封之畧也太公既就國仍為周太師襄十四年王使劉定公賜齊侯命曰昔伯舅太公右我先王世昨太師以表東海禮記太公封于營丘比及五

世皆反葬于周鄭氏曰太公受封留為太師死葬于周五世之後乃葬齊是也其地詩譜曰在禹貢青州岱山之陰濰淄之野古少皞之世與鳩氏之墟昭二十年晏子對景公曰昔與鳩氏始居此地季荊因之有逢伯陵因之蒲姑氏因之而後太公因之杜註與鳩氏少皞之司寇也季荊虞夏諸侯代與鳩氏者逢伯陵殷諸侯姜姓蒲姑氏殷周之間代逢公者逢公事又見于國語伶州鳩對周景王曰我姬氏出自天龜則我皇妣太姜之姪伯陵之後逢公所馮神也韋昭註天龜即元枵齊之分野也皇妣王季之母逢公殷之諸侯死而配食天龜為其神主故曰馮又昭十年有星出于婺女鄭裨竈曰今茲歲在顛頊之墟姜氏任氏實守其地逢公以登星于是乎出杜註顛頊之墟謂元枵齊姜姓任薛姓逢公將死妖星出婺女由是言之君齊上者多姜姓矣其國號曰齊則以天齊淵故史

記封禪書齊之所以為齊以天齊也秦祠八神一  
曰天主祀天齊水經注淄水逕牛山西又東逕臨  
淄縣東得天齊水口水出南郊山下謂之天齊淵  
五泉並出南北三百步廣十步南郊山即牛山也  
水北流注于淄水齊乘天齊淵在淄水之東女水  
之西天齊之義蘇林曰當天中央齊也師古曰謂  
其中神異如天之腹齊記補引晏子曰吾聞江  
深五里海深十里此淵與天齊司馬彪曰齊回水  
如磨齊也其封境史記曰太公封于齊兼五諸侯  
地以尊賢也周成王少時管蔡作亂淮夷畔周乃  
使召康公命太公曰東至海西至河南至穆陵北  
至無棣五侯九伯實得征之即齊桓所云賜我先  
君履也國語桓公反魯侵地堂潛反衛侵地臺原  
姑與漆里反燕侵地柴夫吠狗正封疆地南至  
餉陰西至于濟北至于河東至于紀鄒史遷曰自  
泰山屬之瑯琊北被于海膏壤二千里太公卒子

丁公伋立傳四世至胡公徙都薄姑當周夷王之  
時其少弟山率營丘人攻殺胡公徙薄姑都治臨  
淄是為獻公詩崧高篇王命仲山甫城彼東方又  
曰仲山甫徂齊式遄其歸毛萇曰古者諸侯之居  
迫隘則王者遷其邑而定其居蓋去薄姑而遷于  
臨淄即其事矣臨淄者以臨淄水而得名水經注  
淄水出泰山萊蕪縣原山東北流逕萊蕪谷又西  
北合桑谷水又東北過臨淄縣東戰國策蘇厲曰  
來至淄上有桃梗與土偶人相與語田單為齊相  
見老人涉淄而寒解裘衣之又魯仲連謂田單馳  
騁于淄澗之間蓋淄水在城南澗水在城北也淮  
南子易牙嘗淄澗而別之水經注田巴入齊過淄  
自鏡後漢建武三年耿弇攻張步拔臨淄軍于淄  
水是矣獻公六傳至僖公祿父而入春秋僖公十  
六傳至簡公為田常所弑是年春秋終又三傳而  
田和篡齊齊益富強鹽鐵論曰昔太公封營丘之

墟辟草萊而居馬地薄人少于是通利末之道極  
女工之巧是以鄰國交于齊財畜貨殖世為疆國  
戰國策蘇秦曰臨淄之中七萬戶下戶三男子又  
曰臨淄甚富而實班固曰海岱臨淄之間亦一都  
會也秦滅齊因故城置齊郡其後項羽封田都為  
齊王漢封庶長子肥為齊王置臨淄縣治齊郡後  
漢為齊國治又青州亦治此晉宋及後魏因之後  
齊以齊郡治益都臨淄廢入焉隋開皇十六年復  
置臨淄縣屬青州唐宋因之元又省入益都尋復  
置明屬青州府今因之天齊淵在縣東南八里淄  
水在縣東 臣謹按營丘世有二說班固曰臨淄  
名營丘師尚父所封故齊詩子之營兮遭吾乎嶼  
之間兮師古曰毛詩作還齊詩作營之往也嶼山  
名或作狃臣瓚曰臨淄即營丘故晏子曰太公居  
之又曰先君太公築營之丘今齊之城中有丘即  
營丘此一說也又漢志北海郡治營陵縣應劭曰

師尚父封于營丘陵亦丘也臣瓚非之謂營陵即春秋之緣陵或曰史記言師尚父封營丘未就國東萊與之爭太公聞之夜衣而行至營丘國遂定蓋營丘邊萊邑也呂氏春秋太公封營丘之渚海阻山高險固之地其後五世胡公徙薄姑六世獻公徙臨淄蓋自東而西也此又一說也是二說者諸家平之多左祖班氏酈道元曰爾雅水出前左為營丘營陵城南無水唯城北有一水世謂白狼水西出丹山俗謂之凡山其水東北流異于爾雅前左之文不得為營丘矣今臨淄城中有丘在小城內周迴三百步高九丈北降丈五淄水出其前故有營丘之名與爾雅相符城對天齊淵故有齊城之名郭景純言齊之營丘淄水逕其南及東非營陵明矣孔穎達曰營丘臨淄水上故曰臨淄獻公之徙猶晉氏之深翼居絳其實一城也由此言之臨淄即營丘其說定矣惟營陵為今之昌樂縣

地在臨淄東而萊國為今之黃縣又在其東營丘  
邊萊之說似亦近理然均之相去甚遠也安知當  
日之臨淄不邊萊乎至于海阻山高二邑皆不然  
未宜執此以立論也再按史記原云獻公率營丘  
人以攻胡公是獻公據舊都已久又云徙薄姑都  
治臨淄是不過遷齊國之廟社以就已復新其名  
曰臨淄耳非自薄姑徙臨淄也若緣陵為封祀之  
地而臣瓚曰即營陵哀十四年宋向魋請以鞏易  
薄公曰宗邑也不可夫以宗邑封公族且不可况  
于異姓乎有以知其必不然矣皇覽曰呂尚冢在  
臨淄城南十里此亦可為一證緣陵詳見祀地  
再按杜氏通典臨淄一名營丘漢置營陵縣後漢  
置臨淄縣尤謬兩漢皆並置二縣安得混  
而為一通志營丘城在今縣北二里亦誤

前都蒲姑

昭九年王使詹桓伯辭于晉曰武王克商  
蒲姑商奄吾東土也杜註樂安博昌縣北



有蒲姑城服虔云蒲姑商奄濱東海者也蒲姑齊也商奄魯也即此蒲姑矣史記作薄姑殷末薄姑氏國也周成王時薄姑與四國作亂成王滅之以益太公之封後胡公徙都書序成王伐奄遷其君于薄姑蓋即此是時薄姑已滅矣又莊八年齊侯田于姑蔡杜註姑蔡齊地或以為即薄姑也括地志元和志云薄姑在博昌縣東北六十里漢博昌縣屬千乘郡後漢屬樂安國晉宋因之隋唐屬青州五代唐諱昌改博興元嘗為州明仍改縣屬青州府今仍之齊之薄姑城在縣東北十五里齊乘云俗呼

石門

隱三年齊侯鄭伯盟于石門杜註石門齊地或曰濟北盧縣故城南濟水之門臣謹按水經

注京相璠曰石門齊地今盧縣故城西六十里有故石門去水三百步蓋水瀆流移石門舊在岸側

也今圮于水地在濟南府長清縣西南盧縣見下水經注又云臨邑縣有濟水祠王莽之穀城亭也水有石門以石為之故濟水之門也稍遠似誤

# 盧

隱三年傳齊鄭盟于石門尋盧之盟也鄭伯之車儲于濟杜註盧盟在春秋前盧齊地今濟北盧縣故城臣謹按盧後為齊公子高僕采邑成十七年齊高弱以盧叛襄十八年晉趙武韓起以上軍圍盧二十九年齊高豎又以盧叛晉志扁鵲盧人世謂之盧醫戰國時謂之博陽以在博關南也項羽封田安為濟北王都博陽即此漢置盧縣初屬齊國文帝分置濟北國都盧後屬泰山郡郡都尉治馬和帝永元二年復分泰山置濟北國治此晉因之劉宋為濟北郡治魏兼置濟州隋唐為濟州時亦置郡天寶十四載縣廢五代周改置濟州於鉅野即今濟寧州而盧縣遂廢今盧城在長清縣

西南二十五里地有大清河自平陰縣流入境又東北入齊河縣即濟水蓋鄭伯車饋處

艾

隱六年公及齊侯盟于艾杜註泰山牟縣東南有艾山臣謹按桓十五年公會齊侯于艾即此今

青州府蒙陰西北百二十里有艾山漢牟縣屬泰山郡晉因之在今萊蕪縣東二十里以地勢準之蒙陰正在萊蕪東南當是矣又桑氏水經沂水出泰山蓋縣艾山漢蓋縣屬泰山郡在今沂水縣西北七十里沂水與蒙陰相隣以地勢準之亦相近也林氏曰沂州西二十五里有艾山為齊魯會處齊乘曰艾山在沂州城西三十里與大小鳳凰山相近官溝水自小沂分流自艾山西注去牟太遠非也再按哀十一年及齊師戰于艾陵杜註但云齊地而不言其處自與艾為兩地又盟會之艾不言齊地尚疑地在齊魯之間然不可攷矣孔氏曰艾陵在博縣南六十里漢博縣即今泰安州治張

守節謂艾與艾陵為一地非也蓋其地非牟縣東南不能合于杜註也括地志艾山在博城縣南六十里張洽傳艾屬襲慶府奉符縣漢博縣唐為博城宋為奉符皆誤指艾陵為艾矣今萊蕪縣東北有艾陵亭又附會杜氏牟縣之說而誤者也

嬴

桓

三年公會齊侯于嬴杜註嬴齊邑今泰山嬴縣臣謹按哀十一年公會吳師伐齊克博至嬴十

五年公孫宿以其兵甲入于嬴蓋子反于齊止于嬴禮記延陵季子適齊于其反也其長子死葬于嬴博之間漢初灌嬰敗田橫之師于嬴下尋置嬴縣屬泰山郡後漢初陳俊討張步戰于嬴建安中嘗為嬴郡曹操表糜竺領嬴郡太守是也晉仍為嬴縣宋因之後魏移置于廢萊蕪城唐省復置萊蕪縣嬴遂廢其故城在今泰安州東南五十里或云在萊蕪縣北二十里水經注奉高縣有吳季札

子墓從征記羸縣西六十里有季札兒塚頂  
圓其高可隱也奉高即博所謂羸博之間矣

灤

桓十八年公會齊侯于灤杜註灤水在濟南歷城  
縣西北入濟臣謹按灤水今為小清河志云濟

之南源也其源即趵突泉在濟南府城西南濟水  
伏流重發處也曾鞏曰泰山之北與齊東南諸谷  
之水西北匯于黑水灣又西北匯于柏崖灣而至  
渴馬崖水之來也衆其北折而西悍疾尤甚及至  
崖下則泊然而止自崖以北至歷城之西蓋五十  
里有泉湧出高或至數尺人名曰趵突齊人謂嘗  
有棄糠黑水灣者而見之于此蓋泉自渴馬崖潛  
行地中至此復出也其水冬溫泉旁蔬甲經冬嘗  
榮故又謂之溫泉其注而北則謂之灤水經注灤  
水出歷縣故城西南泉源上涌若輪春秋桓公會  
齊侯于灤是也俗謂之娥英水以泉源有舜妃娥  
英廟故也其水北為大明湖湖西即大明寺寺東

北兩面臨湖引瀆入西郭北流逕歷城東引水為  
流梧池州僚賓燕多萃其上又北注灤水今灤水  
並城北流大明湖在城內自城北水門合灤水又  
東北經華不注山合華泉又東北合大清河謂之  
灤口大清河即濟瀆也宋南渡時灤水分流入章  
丘縣界謂之小清河行五百里至馬車瀆入海明  
時淤廢

禚

莊二年夫人姜氏會齊侯于禚杜注禚齊地  
謹按四年公及齊人狩于禚定九年齊與衛地自  
濟以西禚媾杏皆此也當為齊魯衛  
之國分界之地或曰在長清縣境

穀

莊七年夫人姜氏會齊侯于穀杜注齊地今濟北  
穀城縣臣謹按莊二十三年公及齊侯遇于穀

即此後為管仲采邑亦曰小穀莊三十二年春城  
小穀杜註小穀齊邑濟北穀城中有管仲井大都

以名通者則不繫國左傳為管仲也公感齊桓之德故為管仲城私邑後昭十一年申無宇謂楚子曰齊桓公城穀而真管仲焉至于今賴之杜註城穀事在莊三十二年蓋即指此小穀矣僖二十六年公以楚師伐齊取穀置桓公子雍楚申公叔侯戌之二十八年楚使申叔去穀丈十七年公及齊侯盟于穀宣十四年公孫歸父會齊侯于穀成五年叔孫僑如會晉荀首于穀成十七年齊國佐以穀叛襄十九年晉士句侵齊及穀哀二十七年齊陳成子救鄭及留舒違穀七里穀人不知皆此邑也秦曰穀城漢高以魯公禮葬項王于穀城又圮上老人謂張良後十三年見濟北穀城山下黃石即我也漢五年張良勸漢王自睢陽以北至穀城與彭越尋置穀城縣屬東郡後漢因之晉屬濟北郡劉宋因之後魏屬東濟北郡後齊廢唐武德四年復置穀城縣屬濟州六年廢括地志故穀城在

東阿縣東二十六里明初移東阿縣治此水經注  
穀西北三里即項王冢又今縣東北五里有穀城  
山一名黃山即張良得黃石處再按孔穎達曰  
吳滅州來晉滅下陽皆不繫國知大都以名通者  
不繫國也向寧華亥入于宋南里以叛非大都仍  
繫國矣此闡杜氏大都不繫國之義甚明或者遂  
以為魯邑如中丘郎之類孫氏曰曲阜西北有小  
穀城高氏曰齊自有穀非魯之小穀不惟顯背杜  
氏并左傳正文而疑之矣惟小穀之義則不可解  
竊謂古之名都每有大小二城如臨淄有營丘鄆  
氏以為在小城內耿奔攻張步至淄水上遇步前  
軍恐挫其鋒令步不敢進乃引歸小城分兵陳于  
城下鋒既交乃出精兵橫突步陣大破之此臨淄  
有小城之明驗也或者穀城之有小穀亦如是歟  
水經注濟水過穀城縣西岸側有尹卯壘南去溫  
山四十里是穀城縣界春秋之小穀城也嫌太遠



疑非是

葵丘

莊八年齊侯使連稱管至父戍葵丘杜注葵丘齊地臨淄縣西有地名葵丘臣謹按後漢志

西安縣有蘧丘亭亦曰渠丘或以為即古葵丘連稱管至父戍地也今臨淄縣西有西安故城及蘧丘里即其地矣或謂二人以遠戍故怨而作亂不應近在國都之側疑其非是再按水經注系水北逕臨淄城西門西流逕梧臺里又西逕葵丘北京相璠曰齊西五十里有葵丘若是必無戍理因引胡廣曰汾陰有葵丘謂葵丘當在河東非也傳言連稱令無寵之妹候公子宮因無知之絀遂以作難若在遠境寧能謀及婦人而為公室之亂乎自不得舍近託遠苟成已異也斯言當矣傳又稱二人瓜時而往及瓜請代勿許是以作亂蓋以久戍而怨非以遠戍而怨也再按莊九年經書齊人

殺無知左傳曰初公孫無知虐于雍廩雍廩殺無知昭十一年申無宇曰齊渠丘實殺無知杜註渠丘齊國西安縣地齊大夫雍廩邑漢西安縣屬齊郡武帝封李翔為軹侯食邑西安後漢耿弇討張步步使其弟藍將精兵守西安自守臨淄相距四十里弇進軍晝中居二城間佯言攻西安而襲臨淄拔之藍懼棄西安走劇晉仍屬齊國宋及後魏屬齊郡北齊廢今其古城在臨淄縣西三十里叅考方位里數葵丘渠丘政為一地也再按孔穎達曰渠丘為雍廩之邑傳無其文以彼傳云雍廩殺無知此云渠丘殺無知知渠丘為雍廩邑也鄭衆云渠丘為無知之邑斯言又可味本傳申無宇又曰鄭莊公城櫟而寘子元馬使昭公不立杜註莊公寘子元于櫟厲公因之以殺櫟大夫檀伯孔穎達曰莊公城櫟而寘子元又使檀伯為櫟邑大夫猶之晉封桓叔于曲沃以欒賓傅之鄭使許叔居

許以公孫獲佐之楚使太子建居城父以奮揚助之也然則齊使無知居渠丘又以雍廩為渠丘大夫何不可乎惟無知所處連稱管至父所戍同在一地故得相誘而為非連稱至以妹許無知非平居親習不能也惟渠丘彊大俾弑逆之人得因為資故申無字列之于尾大不掉之數惟無知身在渠丘又不能馭下故渠丘人得殺之無知卒至殞身亦大邑為之累也故曰渠丘殺無知猶之京櫟殺曼伯所重在乎亂國義不繫乎曼伯與無知也潛玩文義端委自明又渠丘蔡丘蘧丘三字同音杜解范史鄭注三家之說宛轉相合渠丘即蔡丘無疑矣存之以俟考

姑婪

見薄

貝丘

齊侯游于姑婪遂田于貝丘杜注姑婪貝丘皆齊地樂安博昌縣南有地名貝丘臣謹按水

經注澠水逕博昌縣故城西西歷貝丘在京相璠曰博昌縣南近澠水有地名貝丘在齊郡西北四十里即齊襄公田處楚語沈諸梁曰齊駟馬濡以胡公入貝水亦即此史記謂之沛丘後漢志博昌有貝中聚是也今博興縣南五里有貝中聚再考漢有貝丘縣屬清河郡應劭曰齊襄公田處周置貝州今為恩縣地屬東昌府此說杜所不取假以為然則遠在數百里外姑莽不得為薄姑葵丘不得在臨淄種種難合矣

酈道元斥應為誤是也

鮑

鮑叔牙杜注小白傅臣謹按濟南府東三十里有鮑城在鮑山下于欽齊乘曰禹後有鮑叔仕齊

食采於鮑因以為氏叔牙是其後裔見三齊記山因城名元遺山濟南行記作咆山誤也俗呼管鮑分金處

乾時

莊九年及齊師戰于乾時杜注乾時齊地時水在樂安界支流旱則竭涸故曰乾時臣謹按

時水即耐水也平地出泉曰耐襄三年齊侯與晉士句盟于耐外哀十四年子我之臣大陸子方以公命取車于道及耐衆知而殺之是也水經注京相璠曰今樂安博昌縣南界有時水西通濟其上源在盤陽北高苑下有死時即春秋所謂乾時杜預所謂時之支流旱則乾竭者也其色黑俗又謂之烏河志云時水出臨淄西南二十五里蓋伏溜所發地名矮槐樹西北迳黃山又北迳愚山又屈而迳杜山澧水入焉又北至濟南府新城縣東南之索鎮可通舟楫又北至博興南之灣頭與小清河會又東迳樂安縣北又東北由馬車瀆入海是泗水之全流也水經注謂之時澗水以下流與澗水合也漢志註又謂之如水如與時音相近

堂阜

管仲請囚鮑叔受之及堂阜而稅之杜注堂阜齊地東莞蒙陰縣西北有夷吾亭或曰鮑叔解

夷吾縛于此因以為名臣謹按水經注桑泉水出五女山又東南堂阜水入焉今蒙陰縣西北堂

阜漢上有夷吾亭

北杏

莊十三年會于北杏杜注北杏齊地或曰在東阿縣境

柯

莊十三年公會齊侯盟于柯杜注此柯今濟北東阿齊之阿邑猶祝柯今為祝阿臣謹按史記齊

桓公與魯會柯而盟又魯頃公卒于柯皆此地後為阿邑趙成侯九年與齊戰阿下又齊威王烹阿

大夫世紀周顯王十三年燕趙會于阿秦時謂之東阿二世二年田儋為章邯所殺田榮收餘兵走

東阿又項梁擊破章邯軍東阿下漢四年彭越渡河擊楚東阿殺楚將薛公置東阿縣屬東郡後漢

因之晉屬濟北國劉宋屬濟北郡後魏因之隋屬  
濟州唐因之後屬鄆州宋因之今屬東平州東阿  
城屢徙隋唐時故城在今縣西二十五里自宋迄  
明又四徙而定于今治則春秋時穀邑也見前古  
阿城在今陽穀縣東北五十里曰阿城鎮有阿城  
上下二閘水經注鄆河故瀆逕范縣北又北逕東  
阿故城東春  
秋書盟于柯

落姑

閔元年公及齊侯盟于落姑杜注齊  
地或曰在今東平州平陰縣界

陽穀

僖三年齊侯宋公江人黃人會于陽穀杜注陽  
穀齊地在東平須昌縣北臣謹按僖十一年

公會齊侯于陽穀文十六年季孫行父會齊侯于  
陽穀宣十六年晉衛伐齊至陽穀昭二十九年齊  
侯與公衍陽穀又齊語桓公大朝諸侯于陽穀哀  
二十一年公先至于陽穀皆此地也漢為須昌縣

地後因之隋因置陽穀縣屬濟州唐改屬鄆州宋開寶六年縣為河水墊沒太平興國八年徙縣于上巡鎮亦謂之孟店即今治也今屬東平州縣東北有穀山小阜也縣以此名縣治南有會盟臺相

傳即齊桓公

會江黃處

# 海

僖四年管仲對楚子曰賜我先君履東至于海西至于河南至于穆陵北至于無棣杜注履所踐履之界臣謹按蘇秦曰齊北有渤海田肯曰西有濁河之限北有渤海之利韓非子齊景公遊于少海今自平州碣石南至登州沙門島皆為渤海即少海也孔穎達曰齊地東至于海當盡樂安北海之東界今濟南東北境皆濱海青州之博興壽光濱渤海日照濱大海登萊二府三面距海當其北者為渤海當其東南者大海也桓公時未能有登萊之境故曰東至于紀鄆後滅萊則東盡于海矣



吳人嘗遣舟師  
自海入齊是也

河

見上 臣謹按孔穎達曰杜預釋例河自汲郡頓丘陽平平原樂陵之東南入海此據其當時之河秦漢以來始然也古之河道自大伾而北過泮水故迹不可復知其大陸則趙之廣澤也大陸以北播為九河九河故道在河間成平以南平原鬲縣以北九河者一徒駭二太史三馬頰四覆釜五胡蘇六簡七滌八鈞盤九鬲津也徒駭最西以次而東鄭註禹貢河間弓高縣往往有其處尚書中候云齊桓霸遏八流以自廣計桓公之時齊之東境當在九河最西徒駭是其西界耳

穆陵

見上杜注穆陵無棣皆齊境也 臣謹按穆陵關在青州府臨朐縣東南一百五里大峴山上

山高七十丈周迴二十里道徑危惡一名破車峴其左右有長城書案二嶺峻狹僅容一軌故為齊

南天險晉義熙五年劉裕伐南燕慕容超召羣臣  
議公孫五樓請據大峴超不從劉裕兵過大峴舉  
手指天喜形于色卒滅南燕宋景平元年叔孫建  
攻青州刺史竺夔于東陽檀道濟自彭城赴援魏  
刁雍謂建曰大峴以南處處險狹請據險邀之建  
不聽道濟至臨朐建遂燒營遁又元嘉二十三年  
魏人寇兗青冀諸州何承天請徙三州新舊降附  
民三萬餘家于大峴南以實內地唐元和十二年  
李道古以淄青拒命引兵出穆陵關守紹定中李  
全據淮安略金陵臨朐據穆陵今亦置戍有穆陵  
關巡司

無棣

見上

臣謹按伏琛齊地記無棣在漢渤海高  
城縣水經注清河入南皮縣界分為無棣溝流

逕高城入海隋改高城為鹽山屬滄州唐仍之杜  
氏通典鹽山春秋之無棣邑也今鹽山縣屬河間

府滄州隋又分陽信縣地置無棣縣屬棣州唐因之宋徙治于周之保順軍屬滄州金廢元分其地置兩無棣縣一仍舊治屬河間路之滄州一屬濟南路之棣州明改河間之無棣為慶雲屬滄州改濟南之無棣為海豐屬武定州蓋二縣皆與鹽山接壤也今海豐滄州之境皆有無棣溝舊合鬲津河東入海唐永徽初滄州刺史薛大鼎開鬲津河因疏無棣溝以通濱海魚鹽之利亦曰無棣河今淤

牡丘

傳十五年盟于牡丘杜注地闕或曰在東昌府城西七十里

廩

傳十八年宋師及齊師戰于廩傳宋敗齊師于廩立孝公而還或曰在濟南府附郭歷城縣界

鄒

傳二十六年公追齊師至鄒勿及杜注公追齊師遠至齊地濟北穀城縣西有地名鄒下臣謹按

公穀作鄗鄭樵云在博州汪克寬云在博平縣北似誤今東阿縣西南有鄗下聚

周首

文十一年齊襄公二年齊王子城父獲長狄僑如弟榮如埋其首于周首之北門杜注周首齊

邑濟北穀城縣東北有周首亭臣謹按水經注濟水過穀城又北逕周首亭西春秋長狄榮如埋

首處也世謂之盧子城京相璠曰盧子城故齊周首邑也魏收志盧縣有盧子城今在東阿縣東近

長清界

鄭

文十六年公子遂及齊侯盟于鄭杜注鄭丘齊地臣謹按鄭丘公羊作犀丘穀梁作師丘賈氏公

羊作菑丘惟左氏經作鄭字後漢志汝南新鄭縣周名鄭丘漢改名新鄭章帝又改名宗縣封殷後為公國隋改潁陽縣尋廢今其地在潁州東春秋時為胡國後并于楚非齊地也戰國屬魏魏安釐

王十一年秦拔鄆丘是矣若夫此盟因齊不肯盟魯納賂以請齊侯必不出境也或云鄆丘在東阿

境縣

### 申池

文十八年齊懿公遊于申池杜注齊南城西門名申門齊城無池唯此門左右有池疑此即是

臣謹按左傳邴歇閭職弑懿公納諸竹中襄十八年晉及諸侯伐齊焚申池之竹木水經注時水出

齊城西南世謂之寒泉東北流直申門京相璠曰申門齊城南面西第一門也今池無復髣髴尚有

竹木遺生左思齊都賦註申池左海濱齊藪也蓋誤晉書慕容德宴庶老于申池左太冲云昭華池

也晏子齊景公出弋昭華之池顏鄧聚生鳥而亡之郡國志謂之左右池即系水原也齊記古齊城

周五十里有十三門其西曰雍門襄十八年晉伐齊伐雍門之萩己亥焚雍門哀十三年陳恒殺闞

止大陸子方出雍門奔衛晏子景公登箬室而望見有斬雍門之楛者戰國策孫子說田忌輕車銳卒衝雍門又齊王建入朝秦雍門司馬入諫說苑韓娥東至齊乏糧過雍門鬻歌于市是也其南曰稷門昭二十二年管子如齊蒞盟盟于稷門之外戰國策談說之士會于稷下蓋齊人于稷門立學舍也史記齊宣王喜文學遊說之士鄒衍淳于髡田駢慎到鄒奭接于環淵之徒皆賜列第為上大夫不治而議號稷下學士由是復盛且數百千人荀卿嘗為稷下祭酒鄭氏曰稷下生齊人亦曰棘下生漢以叔孫通為博士號稷嗣君史記音義曰欲以繼蹤稷下之風矣西北有楊門襄十八年范鞅門于揚門州綽門于東閭杜預曰揚門齊西門東閭齊東門也又東南門曰鹿門昭十年國人追敗樂施高彊于鹿門遂來奔括地志以為武鹿門此古門之可考者也又有虎門昭十年陳鮑伐虎

門晏子端委立于虎門之外是也孔穎達曰鄭氏謂虎門為路寢門或曰非也乃宮之外門又有郭闕則齊郭門也田氏殺闕止于郭闕是矣其章華東門則齊宮門也湣王二十六年蘇代自燕入齊見于章華東門是矣

平州

宣元年公會齊侯于平州杜注平州齊地在泰山牟縣西臣謹按晉牟縣在今萊蕪縣東二

十里詳見牟國魏叔志牟縣有平州城魯邑也漢武封王峽為平州侯食邑于此尋廢今平州城在萊蕪縣西再按水經注濟水過利縣西又東北迤為淵渚謂之平州引應劭云博昌西南三十里有安平亭為證若是則當在青州博興縣境與杜不合誤

垂

宣八年仲遂卒于垂杜注垂齊地非魯竟故書地或曰在東平州平陰縣境

晏

宣十四年晏桓子 臣謹按今濟南府齊河縣北有晏城志云晏嬰采邑也置晏城馬驛以此得名

鞏

成二年魯晉曹衛諸大夫及齊師戰于鞏杜注鞏齊地 臣謹按穀梁傳曰鞏去齊五百里袁婁去

齊五十里孔穎達駁之曰齊之四境不應過遙且鞏已是齊地未必竟上之邑宣得去齊有五百里

乎又云一戰綿地五百里則是甚言之耳釋例土地名鞏與袁婁並闕遠近無以驗之括地志云鞏

城俗名馬鞏城在平陰西十里杜氏通典云鞏在平陰縣東今平陰縣去臨淄果得五百餘里以附

會穀梁之說似可合矣第以本傳考之壬申晉師至于靡笄之下癸酉師陣于鞏自始合以至齊敗

三周華不注既而韓厥奉觴華泉取飲止為一日事甚明史記曰逢丑父為齊頃公右公曰馳之破

晉軍會食射傷卻克克欲還入壁其御曰忍之遂復戰齊急丑父恐齊侯得乃易處頃公為右車絰



于木丑父使公下取飲因得脫去入其軍尤易曉矣。葦地不可知。華不注山在濟南城北則可知矣。其名則見于桑欽水經無可疑矣。若云葦在平陰則去濟南二百三十里何由一奔而遂至于華不注乎。近志云葦即古之歷下殆不易之論也。又經書戰于葦而國語但云靡笄之役知靡笄與葦為一地。杜注靡笄山名。史記晉世家平公元年伐齊靈公戰于靡下。徐廣曰靡當作歷。志曰歷山即左傳所謂靡笄之山也。蓋因靡笄之下省文為靡下。靡字又訛而為歷。俗遂謔為舜畊處。鄭康成云歷山在河東。即雷首山有九名。歷下其一也。然則葦果在歷山之下。司馬貞曰華不注山即靡笄。猶為似是而非矣。以遠近準之去齊都亦有三百里。穀梁原云一戰綿地五百里。又云焚雍門之茨。侵車東至海以戰。地至海為五百里。則戰地至都自不應有五百里疑。更有字畫傳訛耳。齊王建四十年

秦滅魏兵次于歷下漢三年酈食其說齊王罷歷下戰守備韓信度平原襲破齊歷下軍因入臨淄即此三齊記歷下城南對歷山城在山下因名漢置歷城縣屬濟南郡或曰晉永嘉中自東平陵移郡治此今仍之歷山一名千佛山在府南十里

袁婁

見上臣謹按袁婁傳與穀梁皆作爰婁穀梁曰袁婁在師之外註云已逼其國都公羊云逮

于袁婁而與之盟是師猶未至袁婁摠為近郊之辭張氏曰臨淄縣西有袁婁或曰在淄川境

莘

師從齊師于莘杜注莘齊地臣謹按桓十六年衛公子伋使于齊盜待諸莘或謂即此莘地今之

莘縣也蒙上文晉師自衛來理亦相近但杜注一云衛地一云齊地宜莘地原跨兩境齊衛皆得有之乎又考是役齊侯親逆晉師而莘去鞏四百餘里既過于境上即當過勿使進何為不戰引退縱

敵入境四百里至鞏而始戰也由是推之莘亦當為近鞏之地耳

靡笄

見上

華不注

見上鞏杜注華不注山名臣謹按水經注濟水會玉水又東北灤水出焉又東北逕華

不注山單椒秀澤不連陵以自高虎牙桀立孤峯特拔以刺天青崖翠拔望同點黛山下有華泉京

相璠曰華泉華不注山下泉水也春秋晉郤克逐齊師三周華不注逢丑父使公如華泉取飲即此

華泉北絕聽瀆二十里注于濟伏琛云不音跗與詩鄂不韡韡之不同謂花蒂也言此山孤秀如華

跗之著于水也今亦名金輿山四面峻削形如覆斗華泉已涸有鵲山湖匯于山東北流入大清河

華泉

見上

徐闞

齊侯自徐闞入 臣謹按成十七年國佐以穀叛齊侯與之盟于徐闞而復之今淄川縣有古

闞徐

石窳

齊侯以辟司徒之妻為有禮予之石窳杜注石窳邑名齊地盧縣東有地名石窳 臣謹按窳

音幼隋初為盧縣之長清鎮尋置長清縣屬濟州以清水在城南為名唐屬徐州宋至道二年移縣

治于刺榆店即今長清縣治也 古城在今縣城東南三十里

丘輿

晉師從齊師入丘輿擊馬陘杜注丘輿馬陘皆齊邑 或曰丘輿在益都界

馬陘

見上 臣謹按史記馬陘作馬陵齊乘淄水出益都岳陽山北徑萊蕪谷又北徑長峪道亦曰

馬陵即郤克追齊侯處在今益都縣西南

上鄆

公會晉師於上鄆杜注闕臣謹按此齊衛境上邑或曰在陽穀縣境

清

成十七年高弱以盧叛齊侯使國勝告難于晉待命于清杜注清陽平樂平縣臣謹按春秋清邑

屬東郡高帝封功臣室中同為侯邑漢建初中改為樂平縣晉因之改屬陽平郡永嘉中石勒為苟

晞所敗奔樂平即此後齊省襄宇記清城在堂邑縣東南三十里今東昌府堂邑縣東南有清城

東陽

襄二年晏弱城東陽以逼萊子杜注東陽齊竟上邑臣謹按杜氏通典臨朐縣有東陽城一

名凡城今青州府臨朐縣東有東陽城晉志羊穆之築東陽城杜佑云即北海郡治東城也此又

一東陽

而外

見乾時

邾 見萊地

平陰

襄十八年諸侯同圍齊傳曰諸侯伐齊齊侯禦諸平陰塹防門而守之廣里杜注平陰城在濟

北廬縣東北其城南有防防有門于門外作塹防橫行廣一里故經書圍臣謹按孔穎達曰平陰

齊邑而言圍齊者沈氏云君在故言劉炫云下文

門于揚門雍門東閭即是圍事非也襄九年諸侯

伐鄭亦門其三門而經不書圍即知攻門非圍而杜氏以禦諸平陰為圍不可議矣是役也齊師夜

遁晉師入平陰二十三年齊侯伐晉以報平陰之役二十五年崔氏殺驪蔑于平陰昭二十五年齊

侯將唁魯昭公于平陰皆此也隋開皇十八年置掄山縣于漢肥城地屬濟州大業二年改曰平陰

縣蓋取古平陰為名也唐時嘗省改尋復舊今屬東平州章懷太子曰縣東北二十五里有古平陰

城今在縣東北三十五里 再按水經注濟水過臨邑縣西又北逕平陰城西又東北至垣苗城西又東北過盧縣北是平陰在盧縣之西南也京相璠曰平陰齊地在濟北盧縣西南十里是矣蓋杜氏誤也十里太近亦有誤 再按是役殖綽郭最代夙沙衛殿夙沙衛殺馬于隘以塞道二子獲于晉水經注漢賓水出南格馬山北流盧縣故城北今格馬山在長清縣東南六十里志曰即夙沙衛殺馬塞道處也

防門

見上 臣謹按防即齊築長城之始也蘇代曰齊有長城鉅防蓋戰國時七國皆有長城齊城

即托始于此矣水經注京相璠曰防即長城平陰南有故長城東至海西至濟河防門去平陰二里其水引濟故瀆尚存防門之北有光里亦名廣里齊記曰齊宣王乘山嶺之上築長城東至海西至

濟州以備楚括地志長城西北起濟州平陰縣緣河歷泰山北岡上經濟州淄州東至密州琅瑯臺入海郡縣志故長城首起平陰縣北二十九里再按杜注廣里謂塹廣一里也光里之謠蓋起于

俗鄉

巫山

齊侯登巫山以望晉師杜注巫山在盧縣東北臣謹按濟南府肥城縣西北七十五里即齊

侯望晉師處一名孝堂山相傳郭巨葬母于此

京茲

荀偃士臼以中軍克京茲魏絳藥盈以下軍克郭杜注京茲在平陰城東南臣謹按京茲城

在今平陰縣東南

郭

見上杜注郭山在平陰縣西



雍門

池見申

揚門

上同

東閭

上同

郵崇

地見萊

濰

東侵及濰南及沂杜注濰水在東莞東北至北海

都昌縣入海臣謹按昭十三年中行穆子曰有酒如淮有肉如坻劉綽曰淮當作濰水經注濰水出瑯琊箕縣箕屋山東北過東武城縣西北過

平昌縣東又北過高密縣西又北過淳于縣東又東北逕都昌縣東又東北入于海箕屋山在今莒

州濰水自此歷諸城高密安丘濰縣昌邑而入于海昌邑即古都昌境也晉兵所至當在諸城高密

間禹貢青州維淄其道周禮職方青州其浸盧維  
漢初韓信伐齊破楚將龍且于維水隋大業九年  
齊郡丞張須陀擊羣盜于濰水上大敗之即此漢  
地理志濰水過郡三謂城陽琅邪北海也行五百  
三十里沂  
見魯地

祝

柯襄十九年諸侯盟于祝柯杜注祝柯縣今屬濟  
南郡左傳諸侯還自沂上盟于督揚杜注督揚

即祝柯也臣謹按祝柯縣屬平原郡高帝封功臣  
後于祝即此漢為祝柯縣屬平原郡高帝封功臣

高邑為侯邑漢建武五年耿弇討張步分兵守祝  
柯鍾城弇先拔祝柯鍾城人自亡去晉亦為祝柯

縣改屬濟南郡隋屬齊州大業中賊帥盧明月寇  
祝柯齊郡通守張須陀大破之唐以境內有禹息

城改縣曰禹城乾元二年史思明侵濟南守將李  
銳于長清邊家口決大河南至縣縣遂淪陷移治

于遷善鎮即今禹城縣治也宋白曰故  
祝柯城在今長清縣豐齊鎮北二里

### 句瀆之丘

襄十九年齊莊公立執公子牙于句瀆之  
丘 臣謹按襄二十一年復討公子牙之

黨執公子買于句瀆之丘二十八年買在句瀆之  
丘召之反其邑哀六年殺王豹于句瀆之丘皆此

也齊靈公廢太子光徙之東立公子牙為太子屬  
諸嬖妾戎子靈公疾崔杼逆光立之殺戎子尸諸

朝此時牙當出走要亦未能遠也或云句瀆之丘  
在臨淄城內此則未必然應劭曰濟陰句陽縣有

句瀆之丘此宋之穀丘也見宋地  
牙及諸人皆未出境必非此也

### 高唐

北風沙衛入于高唐以叛杜注高唐在祝柯縣西  
臣謹按是年齊慶封圍高唐勿克高唐人

殖綽工樓夜緹納師醢衛于軍二十五年祝佗父  
祭于高唐杜注高唐有齊別廟昭十年齊景公母

穆孟姬為陳無宇請高唐陳氏始大杜注傳言陳氏所以興蓋高唐齊之下邑猶鄭之留宋之亳晉之曲沃也又哀十年趙鞅帥師毀高唐之郭孟子綿駒處于高唐而齊右善歌即此史記齊莊公初晉伐齊至高唐又趙肅侯六年攻齊拔高唐齊威王曰吾臣有盼子者使守高唐趙人不敢東漁于河又魯仲連謂田巴今楚軍南陽趙伐高唐是也漢置高唐縣屬平原郡今為高唐州古高唐城在禹城縣北四十里齊乘曰豐齊鎮北有高唐亭豐齊古祝柯地即杜氏所云也

灑藍

襄十九年崔杼殺高厚于灑藍杜注灑藍齊地或曰在臨淄郊外

大隧

襄十九年齊及晉平盟於大隧杜注闕齊地或曰在今高唐州境

重丘

襄二十五年同盟于重丘杜注重丘齊地臣謹按今東昌府城東南跨往平縣界有古重丘

漢置重丘縣屬平原郡後漢省再按應劭安德縣北五十里有重丘鄉故縣也輿地廣記隋于重

丘故城置將陵縣今為德州

### 奔中

襄二十五年崔氏弑莊公間丘嬰與申鮮虞乘而出及奔中遂來奔杜注奔中狹道臣謹按

哀十六年子我出陳氏追之失道于奔中即此也志云自臨淄西南至長蕪有長峪界兩山間長三

百里中通淄河今為盜賊之藪即奔中也閭丘奔魯自當由此然齊乘所云馬徑亦即此也宣奔中

為峪之摠名而馬徑為峪中之一地歟或言莘縣有奔山誤

### 崇

二十五年傳齊崇公尚之妻東郭偃之姊也杜注崇公齊崇邑大夫臣謹按孔穎達曰楚僭稱王

故縣尹稱公齊不僭號而有崇公者蓋其家臣稱之曰公傳即因而言之如伯有之臣曰我公在壑

谷也志曰孟子勸齊王發棠即此後謠為堂隋置堂邑縣今亦曰堂邑屬東昌府

廩丘

襄二十六年齊烏餘以廩丘奔晉杜注烏餘齊大夫廩丘今東郡廩丘縣故城是臣謹按時

烏餘又襲衛羊角襲魯高魚又取地于宋二十七年晉使胥梁帶執烏餘皆取其邑還諸侯廩丘之地蓋介乎齊晉宋魯衛之間也定八年公侵齊取廩丘之俘哀二十年公會齊人于廩丘二十四年臧為會晉師取廩丘家語齊景公欲以廩丘之邑為孔子養辭不受竹書晉烈公時公孫遜以廩丘叛于趙史記齊宣王五十一年田會以廩丘叛入趙趙敬侯三年救魏于廩丘大敗齊人漢置廩丘縣屬東郡後漢屬濟陰郡三國魏屬東郡晉改屬濮陽國晉末為石虎所陷劉宋亦屬濮陽郡隋屬鄆州大業初省入鄆城縣今廩丘城在東昌府范縣東南瓠河之北杜氏以為故城蓋以故羊角城

為春秋時廩丘也詳見衛地再按孔穎達曰釋地土地名以廩丘為齊地按廩丘地在東郡則是衛之邦邑齊竟不至此也蓋齊人往時取衛邑以賜烏餘如鄭公孫段之得州宋樂大心之有原也宋鄭大夫得以晉地為采邑齊大夫亦得以衛地為采邑矣此說非也傳中分列諸國之地甚明定八年則明以廩丘係之齊復何疑乎又范縣即晉士會之邑蓋此中地界最為紛錯也

崔

襄二十七年崔成請老于崔杜注濟南東朝陽縣西北有崔氏城臣謹按漢朝陽縣屬濟南郡後漢曰東朝陽以南陽郡有朝陽故此加東也晉因之後改屬樂安郡後魏仍曰朝陽縣屬濟南後齊省今朝陽故城在濟南府章丘縣西北六十里水經注漯水經崔氏城北又東南逕東朝陽縣故城南通志曰崔氏城在章丘縣西北二十五里似誤

魚里

襄二十八年陳鮑圍人為優慶氏之士觀優至于魚里杜注魚里里名

嶽

慶封反陳于嶽杜注嶽里名臣謹按本傳陳文子謂桓子曰禍將作矣吾其何得對曰得慶氏之

木百車于莊杜注慶封有木積于六軌之道孔穎達曰六達謂之莊又昭十年陳鮑與欒高戰敗諸莊合莊與嶽即孟子所謂莊嶽之間也管子曰瓊瑤之水通于杭莊之間亦謂國中矣今臨淄城內

有莊嶽里

邶殿

襄二十八年與晏子邶殿其鄙六十杜注邶殿齊別都以邶殿邊鄙六十邑與晏嬰臣謹按

晏子春秋景公封晏子于都昌辭而不受景公先以封逢丑父漢嘗置昌縣寰宇記云昌邑有都昌古城齊乘曰即城南五里之大營城也今其地在平度州昌邑縣西疑即所謂邶殿者然晏子春秋



又云景公為晏子封邑使田無宇置臺與無鹽不受宣亦邲殿乎是知都昌即邲殿其說不可通矣考本傳晏子曰吾邑不足欲也益之以邲殿乃足欲足欲亡無日矣蓋古者增封每因其原封而附益之晏子邑本小益以邲殿六十乃大而足欲也如昭十年陳桓子請老于莒公與桓子莒之旁邑辭哀十四年桓魋請以鞶易薄公不可乃益鞶七邑是也晏子本封于晏今在齊河境邲殿當亦在

此耳詳前晏地

莒

昭三年齊侯田于莒杜注莒齊東境臣謹按莒齊邑陳氏食采于此昭十年陳桓子請老于莒是

也蓋取地于莒遂謂之莒如鄭取許田而謂之許楚取沈邑而謂之沈魯有薛地而謂之薛耳

寧風

昭五年孟仲之子殺豎牛投其首于寧風之棘上杜注齊地

羽山

昭七年鄭子產曰昔堯殛鯀于羽山其神化為黃熊以入于羽淵杜注羽山在東海祝其縣東

南臣謹按禹貢羽畎夏翟孔傳云夏翟雉名羽中旌旄羽山之谷有之曾氏註云羽山之谷雉具

五色因以羽名即殛鯀處也祝其漢縣屬東海郡晉因之唐廢地在今海州贛榆縣西五十里縣西

北八十里即羽山高四里周圍八里西距沂州七十里山下有潭曰羽潭亦曰羽池即羽淵也寰宇

記曰羽山在胸山縣西北九十里漢胸山縣即今海州治蓋地相接也再按孔氏孟子疏羽山在

東齊海中今登州東南三十里亦云有羽山與杜異不取齊乘曰近羽山有鯀城相傳魏將田預所

築因羽山為名又劉昭云鍾離城南有羽泉皆謂舜殛鯀處齊乘云鍾離在沂州西南百餘里楚將

鍾離昧所築與杜氏之說亦相近

薄姑 見前

稷 昭十年陳鮑伐樂高戰于稷敗諸莊又敗諸鹿門杜注稷祀后稷之處 臣謹按隋志臨淄有稷山

齊記補上有后稷祠故名今臨淄縣西南十三里有稷山或曰稷下之名以此

莊 見前

鹿門 見前

棘 昭十年陳桓子召子山而反棘焉杜注棘子山故邑齊國西安縣東有戟里亭 臣謹按後漢志作

棘里今臨淄縣西北有棘里亭或謂之戟里城括地志以為即畫邑西安見前蔡丘

夫子 召子周與之夫于杜注濟南於陵縣西北有于亭 臣謹按於陵齊邑陳仲子所居漢置縣屬濟

南郡後漢屬濟南國晉改為烏陵旋廢今濟南  
長山縣西南二十里有於陵城又縣西有于亭

渠丘

見前

澗

昭十二年晉侯與齊侯宴投壺齊侯曰有酒如澗  
有肉如陵寡人中此與君代興杜注澗水出齊國

臨淄縣北入時水臣謹按水經注澗水出營丘  
城東世謂之漢湊水西陵樂安博興與時水合古

諺云瘦馬不渡澗南燕李宣稱澗水不冰今在臨  
淄縣西南其源即申流也分為二流西流曰系水

北流曰澗水

聊攝

昭二十年晏子曰聊攝以東姑尤以西杜注聊  
攝齊西界也平原聊城縣東北有攝城臣謹

按聊城齊邑戰國時田單破燕兵復齊國燕將據  
聊城不下魯仲連射書城中燕將見書涕泣自殺

田單屠聊城即此秦置聊城縣屬東郡漢十一年陳豨反代地使其將張春擊聊城魏晉俱屬平原郡劉宋屬魏郡隋置博州治此唐武德初為宇文化及所據竇建德克之唐以後皆為博州治今為東昌府治治城自石晉汴宋以河患再徙古聊城在今府西北十五里水經注潔水又北經聊城故城西城內有金城周匝有水南門有馳道絕水南出東門側有層臺即魯仲連所謂還高唐之兵却聊城之衆者也今城東亦有魯連臺高七丈蓋倣古築之也再按攝城一作聶城詳見邢地

### 姑尤

見上杜注姑尤齊東界也姑水尤水皆在城陽郡東南入海臣謹按姑水今曰大沽河發源

于登州府黃縣西南三十里之蹲狗山東南福山界又折而西南歷招遠萊陽以至平度州南故即墨城尤水今曰小沽河發源于萊州府東南三十里之馬鞍山亦東南流至平度州與大沽河合通

名沽河至膠州即墨縣入海二水起北海至南海行三百餘里繞齊東界故曰姑尤以西

沛

昭二十年齊侯田于沛杜注沛澤名

端臺

昭二十年晏子侍于端臺臣謹按端臺在臨邑西五十里俗呼歇馬臺

野井

昭二十五年齊侯唁公于野井杜注濟南祝柯縣東有野井亭臣謹按後漢志祝柯有野井

亭左傳齊侯將唁公于平陰公先至于野井今在齊河縣東濟河北岸有祝柯地也

稷門

見申池

媚

定九年齊侯致禡媚杏于衛杜注三邑皆齊西界臣謹按哀十五年子貢對陳成子曰昔齊為衛

故伐晉冠氏喪車五百因與衛地自濟以西禡媚杏以南書社三百言致則三邑入于衛矣言以南

則似割三邑之南境以與衛非全致也。禚地近魯見前或曰媚在濟南禹城界杏在東昌博平界。

杏

見上

夾谷

定十年公會齊侯于夾谷左傳公會齊侯于祝其實夾谷杜註夾谷即祝其也。臣謹按後漢

志東海郡祝其縣即古夾谷水經注游水北逕祝其故城西縣東有夾口浦杜氏通典懷仁縣有夾山即夾谷漢祝其城在頓榆南五十里唐懷仁縣即今頓榆縣治也寰宇記夾谷山在頓榆東五十里遞相傳述並用漢志之說無異辭矣然以道里計之祝其縣僻處海隅去齊魯之都數百里非會盟之輒所宜至且杜氏不引之以為解蓋左傳所云祝其自是古地祝其縣非襲古名也近志濟南淄川縣西南三十里有夾谷山一名祝其為定公會齊侯處較為近理。

安甫

定十年齊侯衛侯鄭游速會于安甫  
臣謹按公羊作鞍張洽傳曰齊地

賴

哀六年公子陽生入齊使胡姬以安孺子居賴又  
使朱毛遷孺子駘不至殺諸野幕之下葬諸父冒

淳杜注賴齊邑

臣謹按哀十年晉趙鞅伐齊毀

高唐之郭及賴而還即此後漢志管縣有賴亭管

縣屬濟南國晉有故城在今章丘縣西

北三十里賴亭在濟南府東章丘縣界

駘

見上杜注駘齊邑  
臣謹按裴駘注史記引列女  
傳云太姜為有台氏之女路史遂謂有二駘一在

武功一在瑯邪也國語云姜氏出自元龜皇妣太

姜之姪伯陵之後逢公之所憑神也則太姜之見

實在東國或別有封于駘者然

不可考矣或曰在臨朐縣界

父冒淳

見上杜注地名  
臣謹按路史曰父父戕國  
一名冒澤山海經曰炎帝之孫伯陵生父鼓



延父始為鍾路史曰  
受鼓延伯陵三子也

潞

哀八年悼公使鮑子居潞杜注潞齊邑臣謹按  
哀十七年齊人伐衛執公孫般師以歸舍諸潞即

此或曰在  
齊郊外

鄆

哀十年公會吳伐齊  
師于鄆杜注鄆齊地

犁

哀十年晉趙鞅伐齊取犁及轅毀高唐之郭侵及  
賴而還杜注犁一名隰濟南有隰陰縣臣謹按

哀二十三年伐齊戰于犁丘齊師敗績知伯親禽  
顏庚杜注犁丘隰也哀二十七年陳成子救鄭召

顏涿聚之子晉曰隰之役而父死焉杜注隰役在  
二十三年孔穎達曰涿聚即庚也知三名為一地

矣或曰齊大夫隰氏之采邑漢置潔陰縣屬平原  
郡應劭曰縣在潔水之南因名後漢改曰隰陰仍

屬平原郡建安六年袁譚將劉詢起兵以叛晉省  
杜云屬濟南蓋曹魏時事也石趙復置濕陰縣宋

武平廣固嘗僑置青州于此尋廢今濼陰城  
在濟南臨邑縣西十里有黎丘子讀書臺

**轅**

見上杜注祝阿縣西有轅城 臣謹按漢置瑗縣  
屬平原郡水經注轅即瑗也後漢省今禹城縣西

北有轅城或云  
在縣南百里

**清**

哀十一年齊國書伐我及清杜注齊地濟北盧縣  
東有清亭 臣謹按水經注濟水自魚山而北逕

清亭今在長清縣東又隱四年公及宋公遇于清  
杜注衛地濟南東阿縣有清亭蓋當時濟水流于

二邑之間而清地跨占其左右故二國皆有清也  
濟水一名清水地以此名辨齊魯之界此為最確

矣

博

哀十一年公會吳伐齊及博至于嬴杜注博嬴齊邑也二縣皆屬泰山臣謹按國語吳王使王孫

苟告周曰遵汶伐博延陵季子葬于嬴博之間漢三年韓信襲破田橫走博陽漢書作博是也漢置

博縣屬泰山郡晉宋因之後魏改縣名博平為泰山郡治隋罷郡再改縣名曰博城屬兗州唐宋因

之唐嘗改縣曰乾封宋復改曰奉符皆以封禪泰山故也宋世縣治再徙金復舊置軍尋升泰安州

明省附郭奉符縣入之屬濟南府

艾陵

見前

舒州

見薛地

檀臺

哀十四年公與婦人飲酒于檀臺臣謹按臨淄縣東一里有檀臺

豐丘

子我攻陳氏不勝適豐丘豐丘人執之殺諸郭闕杜注豐丘陳氏邑

郭闕

見申池

蒙

哀十七年公會齊侯盟于蒙杜注蒙在東莞蒙陰西故蒙陰城也臣謹按漢置蒙陰縣屬泰山後

漢省晉志有蒙陰縣屬瑯邪國太康中始置東莞

郡蓋蒙陰初置時嘗屬之也其復置之處已非舊

地故以漢縣為故城後魏又廢東魏復置高齊省

入新秦縣元復改置蒙陰縣于今治屬莒州縣東

廿里綿山社有古城周二室舊址猶存相傳為戰國時築也

顧

哀二十一年公及齊侯盟于顧杜注顧齊地臣謹按詩云韋顧既伐昆吾夏桀即此顧

春秋地名攷畧卷三

欽定四庫全書

經部

春秋地名考畧卷五

詳校官監察御史劉湄

給事中臣溫常綬覆勘

總校官庶吉士臣倉聖脉

校對官助教臣羅萬選

謄錄貢生臣周培

欽定四庫全書

春秋地名攷畧卷四

詹事府詹事高士奇撰

晉上

國於絳

史記周成王與弟叔虞削桐為珪曰以此封若史佚因請擇日立叔虞于是遂封虞于唐

唐在河汾之東方百里故曰唐叔虞鄭氏詩譜唐

曰太原晉陽是也唐叔子變改為晉侯變曾孫成

侯南徙曲沃近平陽其孫穆侯又徙于絳云史記自成侯至穆侯傳五世鄭氏但曰其孫畧言之耳

桓二年左傳追序晉事曰穆侯太子曰仇其弟曰成師惠二十四年文侯卒子昭侯封桓叔于曲沃

文侯即仇桓叔即成師也惠三十年晉潘父弑昭  
侯而納桓叔不克晉人立孝侯惠四十五年曲沃  
莊伯伐翼弑孝侯翼人立其弟鄂侯隱五年曲沃  
莊伯以鄭人邢人伐翼杜注莊伯成師于翼晉舊  
都在平陽絳邑縣東是年秋王使虢公伐曲沃而  
立哀侯于翼哀侯鄂侯子也桓八年春滅翼史記  
晉武公始都晉國即此武公莊伯子也生獻公左  
傳莊二十六年夏晉士蒍城絳以深其宮杜注絳  
晉所都也今平陽絳邑縣時即獻公九年矣按鄭  
氏言絳不言翼意即指翼為絳杜氏絳翼兩注仍  
有微分據水經注澮水出詳高山亦曰澮山西經  
翼城南詩譜言晉穆侯遷都于絳孝侯改絳曰翼  
獻公又北廣其城方二里命之為絳是也依此則  
翼絳為一地矣杜云翼在絳東酈云廣其城或者  
即一城而酈大之乎應劭曰絳水在絳西南又水  
經注絳水出絳山西北流注澮邑以山水得名則



其來舊矣僖十三年秦輸粟于晉自雍及絳成六年遷新田後謂之故絳漢為絳縣地屬河東郡高注在縣東八十里晉屬平陽國後魏置北絳縣于此兼置北絳郡治馬隋初郡廢縣屬絳州十八年改為翼城縣義寧初于此置翼城郡唐改曰澧州尋罷以縣屬絳州五代唐徙縣治于王逢寨即今治也古翼城在今治東南十五里臣謹按史記獻公八年士蒍說公曰故晉之羣公子多不誅亂且起乃使盡殺諸公子而城聚都之命曰絳始都絳此與左傳互異左傳桓莊之族偪獻公患之士蒍曰去富子則羣公子可謀也已二十四年乃城聚而處之冬晉侯圍聚盡殺羣公子二十六年士蒍城絳以深其宮是城聚城絳本二事也史遷一之誤矣今絳州絳縣東南十里有車箱城相傳為晉置羣公子之所西魏于此置建州以楊標為刺

史鎮之又漢志絳晉武公自曲沃徙此是始都絳者亦非獻公也

### 別都曲沃

曲沃自穆侯徙絳後為晉大邑惠二十四年晉始亂故封桓叔于曲沃師服曰天子建

國諸侯立家今晉甸侯也而建國言大邑不當以封也隱五年曲沃莊伯以鄭人邢人伐翼杜注曲

沃在河東聞喜縣曲沃叛王王命虢公伐曲沃桓八年曲沃滅翼九年虢仲芮伯荀侯賈伯伐曲沃

莊十六年王使虢公命曲沃伯以一軍為晉侯史記武公二十八年伐晉侯緡滅之盡以其寶器獻

周釐王王命武公為晉君于是盡并晉地而有之始都晉國自桓叔初封曲沃至武公滅晉凡六十

七歲即此也武公既徙絳曲沃復為大邑莊二十八年驪姬使言于晉侯曰曲沃君之宗也不可以

無主晉侯使太子居曲沃僖四年太子祭于曲沃歸胙于公驪姬譖之太子縊于新城杜注新城即

曲沃僖十年晉侯改葬共太子狐突適下國見太子于新城又太子謂狐突曰請七日見我于新城西偏杜註下國即曲沃正義曰曲沃邑而稱國者桓叔國之三世晉之舊國也蓋猶周以成周為下都矣僖二十四年晉公子入于曲沃朝于武宮自後為欒氏之食邑襄二十三年晉欒盈入于曲沃胥午伏之而觴曲沃人皆歎有泣者四月欒盈帥曲沃之甲以盡入絳晉亡入魏戰國策周顯王四十六年秦代魏取曲沃赧王元年秦復伐魏取曲沃而歸其人秦謂之左邑水經注左邑故曲沃詩所謂從子于鵠者也漢元鼎六年分左邑縣地置聞喜縣東漢罷左邑移聞喜縣治焉後周移縣治今絳州之栢壁隋移治甘谷寰宇記今縣東二十里有甘谷口甘泉出焉即其地也唐復移治桐鄉故城五代移今治今左邑城在解州聞喜縣東臣謹按晉世家無成侯徙曲沃事考孔疏云成王

滅唐封叔虞今太原晉陽縣是也變父改之曰晉  
成侯徙曲沃今河東聞喜縣穆侯徙都絳也蓋亦  
用詩譜今從之班固云聞喜本曲沃晉武公自晉  
陽徙此武字乃成字之訛再按晉有兩曲沃西  
征記陝州有曲沃臺晉滅虢  
以曲沃之官守之故名詳瑕

### 遷于新田

成公六年晉人謀去故絳諸大夫皆曰必  
居郇瑕氏之地韓獻子曰不如新田土厚

水深居之不疾有汾澮以流其惡公從之遷于新  
田杜預故絳註曰晉人復命新田為絳故謂此故  
絳新田今平陽絳邑縣是襄二十三年欒盈晝入  
絳昭十年秦后子造舟于河十里舍車自雍及絳  
二十九年龍見于絳郊定十三年趙鞅歸晉入于  
絳皆是也水經註澮水合絳水又西經絳縣南即  
新田也在澮之陽南對絳山澮水又西經虎祁宮  
南又西至王橋入汾汾水自臨汾經絳縣故城北

又西經虜祁宮北又西至正平郡蓋新田在二水之間所謂有汾澮以流其惡也漢于南境置絳縣此仍謂之絳城俗又謠為王城後魏置曲沃縣于絳山北後周移治樂昌堡在今縣南七里亦曰樂昌城隋又移治絳邑故城北括地志漢絳縣故城在曲沃縣南二里本晉新田是也魏曲沃縣屬正平郡隋屬絳州唐以後因之明屬平陽府今縣治西南二里有絳城

大夏

昭元年子產曰昔高辛氏有二子曰伯曰闕伯季曰實沈居于曠林不相能也日尋干戈以相征

討后帝不城遷闕伯于商丘商人是因故辰為商星遷實沈于大夏主參唐人是因以服事夏商其季世曰唐叔虞當武王邑姜方震大叔夢帝謂已余命而子曰虞將與之唐屬諸參而蕃育其子孫及生有文在其手曰虞遂以命之及成王滅唐而封太叔焉故參為晉星杜註大夏晉陽也唐人若

劉累之等累遷魯縣此居大夏唐人之季世其君曰叔虞孔疏曰唐人當是陶唐之後二十九年傳云陶唐氏既衰其後有劉累知此唐人是劉累之等類也言等類者謂劉累後世子孫累雖遷魯縣子孫仍在大夏故歷夏及商也服虔謂唐人即劉累故杜顯而異之帝命邑姜之子曰虞者將以唐國與之取唐君之名以為名耳又臺駘處太原杜註太原晉陽也又定四年祝佗曰分唐叔以大路密須之鼓闕鞞姑洗懷姓九宗職官五正命以唐誥而封于夏虛杜註懷姓唐之餘民九宗一姓為九族五正五官之長夏虛大夏今太原晉陽也又昭元年晉荀吳帥師敗狄于大鹵公羊作太原杜註大鹵太原晉陽也世本曰唐叔居鄆宋忠曰鄆地在今大夏索隱曰唐侯之後封夏虛而都于鄆桓六年翼九宗五正逆晉侯于隨納諸鄆晉人謂之鄆侯杜註鄆晉別邑尋考傳註蓋大夏太原大

鹵夏墟唐鄂晉凡七名皆晉陽一地也尚書既修  
太原春秋說題辭曰高平曰太原原端也平而有  
度廣延曰大鹵穀梁傳曰中國曰太原夷狄曰大  
鹵尚書大傳曰大而高平者曰太原水經曰汾水  
東南過晉陽縣東晉水從縣東南流注之山海經  
曰縣雍之山晉水出焉郭註今在晉陽縣西名汲  
甕漢志云唐有晉水故叔虞子變為晉侯是也齊  
桓公西伐大夏涉流沙似亦即此桓六年翼人納  
晉侯于鄂八年武公滅翼王使虢公立哀侯之弟  
緡于晉鄂即晉也竹書紀年晉侯緡九年曲沃尚  
一軍異于晉史記武公伐晉侯緡滅之王命為晉  
君蓋莊十六年也後曰晉陽為趙氏食邑定十三  
年趙鞅入于晉陽以叛其後簡子使尹鐸為晉陽  
及知伯攻趙襄子走晉陽知伯與韓魏圍而灌之  
沉窳產鼃民無叛意卒滅知伯秦紀莊襄王三年  
拔趙晉陽置太原郡漢高十一年封子恒為代王

都晉陽都邑記晉陽有三城一曰大明城左氏謂董安于所築即古晉陽城也高齊于此置大明宮隋更名新城唐義旗初建高祖使元吉居守即斯地矣唐徙晉陽縣治汾水東宋初以縣為平晉軍尋罷軍為平晉縣後又徙治永利監屬太原府金因之明初復移縣于汾水西洪武八年改為太原縣即古唐國也臣謹按或言堯禹皆嘗都晉陽似未必然世紀但云堯都平陽禹都安邑而晉國初建唐人是因乃指唐之後裔註疏言之詳矣蓋後人緣唐夏之號而附會堯禹未足信也再按都邑攷虞叔封唐變父徙居晉考諸書皆言變父改號曰晉無徙都事或言古唐國在太原縣北古晉陽城在太原縣東北蓋亦相近也其國都小有更置則有之朱子詩集註南有晉水至于變乃改國號曰晉亦同再按漢志太原郡晉陽縣註云故詩唐國周成王滅唐而封太叔龍山在西北晉水所



出後漢志龍山即縣雍山也而臣瓚曰所謂唐今河東永安是去晉四百里師古是之水經注汾水自冠爵津南經永安縣西歷唐城瓚註漢書云堯所都也括地志云故唐城在翼城縣西二十里轉相傳襲如出一口永安漢初為彘縣今為霍州但據參為晉星晉封夏虛左傳本文甚明是以註疏無異辭朱子亦云在禹貢冀州之域太行恒山之西太原大岳之野瓚說鑿空杜撰不可從再按括地志云故鄂城在慈州昌寧縣東二里後魏昌寧縣今為吉州鄉寧縣世本諸書甚明無容初為異說矣附訂于後

大鹵

上見

太原

上見

唐

上見

鄂

上見

晉

上見

晉陽

上見

隨

隱五年翼侯奔隨  
食邑于隨即此今介休縣東有隨城

臣謹按晉士會

條

桓二年晉穆侯以條之役生太子杜註晉地  
謹按今解州安邑縣東南有中條山又縣北三十

里有鳴條岡括地志高涯原在安邑縣北其南坂  
口即古鳴條陌岡北與夏縣接界即舜所葬也孟

子曰舜卒于鳴條尚書大傳伊尹相湯伐桀戰于  
鳴條即此通雅云河間府景州有古條漢置條縣

即周亞夫所封也為  
晉條地太遠當誤

千畝

其弟以千畝之戰生杜註西河介休縣南有地名千畝後漢志太原之界休縣有千畝聚即

晉戰千畝處介休晉屬西河國周宣王九年戰于千畝王師敗績于姜氏之戎亦即此今介休縣南

有千畝原

陘庭

哀侯侵陘庭之田陘庭南鄙啟曲沃伐翼三年曲沃武公伐翼次于陘庭逐翼侯于汾隰獲之

杜註陘庭翼南鄙邑臣謹按襄二十三年齊侯伐晉取朝歌遂分二隊入孟門登太行張武軍于

熒庭杜註張武軍築壁壘也熒庭晉地蓋即陘庭矣晉世家哀侯八年侵陘庭陘庭與曲沃武公謀

九年伐晉于汾旁虜哀侯賈逵曰陘庭翼南鄙邑名亦謂之陘城韓世家桓惠王九年秦拔我陘城

汾旁孔氏曰陘城在汾水旁似誤  
蓋謂自逕庭以至于汾旁地也

汾隰

見上 臣謹按汾隰史記作汾旁蓋翼地之近  
汾者今曲沃縣西三十里有汾水自太平縣南

流經縣界折而  
西入絳州境

聚

絳見

蒲

莊二十八年驪姬使梁五東闕五言于公曰蒲與  
二屈君之疆也杜注蒲今平陽蒲子縣二屈今平

陽北屈縣或云二當為北 臣謹按是年晉侯使  
重耳居蒲城僖四年重耳奔蒲五年公使士蒍築

蒲與屈不慎公使寺人披伐蒲二十四年寺人披  
謂晉侯蒲人狄人余何有焉即此也戰國策秦伐

蒲蒲人恐請胡行殺蒲衍說樗里子解去史記魏  
世家襄王七年秦降我蒲陽又景緡王五年秦取

我蒲陽秦紀惠王十年使公子華張儀圍魏蒲取  
之漢置蒲子縣屬河東郡魏晉屬平陽郡永嘉二  
年劉淵取河東自離石徙都蒲子是也後周改置  
長壽縣于今隰州治隋置西汾州尋改縣名曰隰  
川州曰隰州唐以後因之括地志蒲邑故城在隰  
川縣南蒲水經其南亦曰蒲陽通釋云蒲陽故城  
在隰川縣北四十五里蒲水北即重耳所居  
括地志誤也明洪武二年省隰川縣入州治

## 二屈

見上  
四年夷吾奔屈六年晉侯使賈華伐屈夷吾不

能守盟而行又晉有屈產之乘皆此也戰國屬魏  
漢置北屈縣屬河東郡壺口山在東南應劭曰有  
南故加北臣瓚曰汲郡古文翟章救鄭次于南屈  
是也北屈後漢如故魏晉屬平陽郡晉建興初并  
州刺史與代公猗盧伐劉聰猗盧遣拓拔普根屯  
于北屈升平初姚襄將圖關中自北屈渡河水經

注北屈西距河十里魏叔志神麌元年擒赫連昌  
因于北屈置禽昌縣後改置定陽縣于今吉州治  
又置定陽郡南汾州治焉隋改縣名曰吉昌五代  
唐又改吉鄉自北齊至元州名屢改至元曰吉州  
省吉鄉縣入之明仍之今北屈  
廢縣在州治東北二十一里

垂棘

僖二年晉荀息請以屈產之乘與垂棘之璧假  
道于虞以伐虢杜註屈地生良馬垂棘出美玉

成五年傳鄭伯及晉趙同盟于垂棘杜註晉地  
臣謹按垂棘地闕爾雅曰西方之美者有霍山  
之多珠玉焉又山海經載管涔少陽縣雍諸山  
在汾晉間者多出玉知晉地之產玉者多矣

屈產

見上臣謹按公羊疏謂屈產為地名不似服  
氏謂產生也今石樓縣南有龍泉山接隰州界

水經注龍泉出吐京城東南道左山下牧馬川上  
多產名駒亦名屈產泉志云屈產泉在縣東南四

里

采桑

僖八年晉里克敗狄于采桑杜註平陽北屈縣西南有采桑津臣謹按采桑史記作齧桑晉

世家獻公二十五年晉伐翟以重耳故翟亦擊晉于齧桑即此里克敗狄事服虔以為翟地索隱以

為衛地皆誤也水經註河水又南為採桑津又南逕北屈故城西今其地在吉州西魏世家襄王十

二年諸侯執政與秦相張儀會于齧桑徐廣曰在梁與彭城之間此又一齧桑瓠子之歌所云齧桑

浮兮淮泗滿者也

高梁

僖九年傳齊侯以諸侯之師伐晉及高梁而還杜註晉地在平陽縣西南僖十五年史蘇繇

曰明年其死于高梁之虛杜註晉地在平陽楊氏縣西南二十四年晉公子使殺懷公于高梁杜

註在平陽楊縣西南臣謹按此一高梁也杜氏  
三註互異後人遂以滋疑今考後漢志楊有高梁  
亭惠公死高梁處晉地道記梁城去楊縣五十里  
括地志高梁在臨汾縣東北二十七里晉楊縣在  
今洪洞縣東南晉平陽縣今之臨汾縣也二縣相  
隣洪洞在北臨汾在南洪洞之西南即臨汾之東  
北其為一地無疑矣晉書楊縣屬平陽郡而杜預  
或作楊氏蓋一時兼有二稱至于齊侯代晉註則  
偶脫一楊字耳括地志改平陽西南為平陽東北  
似乎有見然不如加一楊字也楊氏古邑別有註  
見昭二十八年竹書紀年晉出公二十年智伯瑤  
城高梁漢高十二年封鄴食其子疥為高梁侯邑  
于此水經汾水西南過高梁邑故高梁氏之墟也  
又滴水源出巢山東谷北逕浮山又西北流與勞  
水合亂流逕高梁城北西入于汾宇文周建德五  
年齊王高緯圍平陽周主邕自將救之高阿那肱



議却守高梁橋既而兩軍合戰齊主犇高梁遂北走橋蓋以故城名也郡志今其地名程王里亦曰

梁墟地名考謂在臨晉縣相去甚遠大誤

新城

見曲沃

下國

見曲沃

韓

僖十年帝許我罰有罪矣敝于韓杜註韓晉地十五年晉侯及秦伯戰于韓傳戰于韓原括地志

韓原在同州韓城縣西南八里又縣南十八里為

古韓國竹書平王十四年晉文侯二十四年晉人

滅韓史記韓之先與周同姓其後苗裔事晉得封

于韓原曰韓武子按世本武子之先韓萬曲沃桓

叔之子也國語叔向謂韓宣子能修武子之德宣

子拜曰自桓叔以下嘉吾子之賜是晉之公族非

但周同姓矣今韓原在  
韓城縣東南二十里

沙鹿

僖十四年沙鹿崩杜註沙鹿山名平陽元氏縣  
東有沙鹿土山臣謹按穀梁傳云沙鹿晉山

林屬于山為鹿沙山名也公羊傳云沙鹿者何河  
上之邑也此邑也言崩何襲邑也註云襲者至地  
中解曰謂嘿然而陷矣今大名府東四十五里有  
沙麓山又府東三十里有沙鹿城亦謂之陷城此  
穀梁以為山公羊以為邑也水經註元城縣有沙  
丘堰大河所經以沙鹿山而名又沙鹿亦名女姓  
丘周穆王女叔姓曾屈此故名漢書王翁孺徙魏  
郡之委粟里元城建公曰春秋沙鹿崩晉史卜之  
曰後六百四十五年當有聖母與其齊田氏乎今  
翁孺徙居正值其地日月當之踰八十年其言當  
驗既而元后政君生揚雄贊曰太陰之精  
沙鹿之靈作合于漢配元生成即此矣

號畧

僖十五年晉侯許賂秦伯以河外列城五東盡號畧南及華山內及解梁城杜註河外河南也

東盡號畧從河南而東盡號畧也解梁城今河東解縣也華山在弘農華陰縣南臣謹按晉滅號

國漢于此置弘農郡尋以避諱改恒農隋復舊唐置號州宋金仍之元廢今陝州靈寶縣西有古恒

農城胡氏曰隋河南郡陝縣後魏之恒農郡也弘農郡所治之弘農縣後魏之西恒農郡也宋熙寧

中改弘農縣曰號畧金因之元廢又有號畧關在今靈寶縣南百里元并廢置巡司馬今為號畧鎮

元豐志自河南府西南抵號州界三百二十五里稍南抵鄧州界六百里皆高山深林古號畧也水

經註陸渾山出涓水兩源俱導而東注號畧在陸渾縣西九十里司馬彪曰縣西號畧池春秋所謂

東盡號畧者也

華山

見上 臣謹按華山在今陝西華陰縣南十里  
華陰為晉之陰晉邑此云東盡虢畧南蓋陰晉

亦在五城之中矣

解梁城

見上 臣謹按解梁城戰國為解戰國策報  
王十一年秦敗魏師于解是也漢置解縣屬

河東郡晉因之後魏為南解縣西魏改廢杜佑曰  
春秋時解梁城在漢解縣西今蒲州臨晉縣東南

十八里有解城

陰

僖十五年陰飴甥會秦伯杜註陰飴甥即呂甥也  
食采于陰故曰陰飴甥 臣謹按晉侯使卻乞告

瑕呂飴甥且召之杜註瑕呂飴甥即呂甥也蓋姓  
瑕呂名飴甥字子金今霍州西三里有呂鄉州西

南十里有呂城蓋皆以飴甥所居而得名後以賜  
魏錡故復有呂錡呂相之稱隋因置呂州亦曰呂

州城唐武德二年世民破劉武周將尋相于吕州  
即此吕既為姓非邑名或謂即陰邑今州東南十

五里又有  
陰地村

狐厨

傳十六年秋侵晉取狐厨受鐸涉汾及昆都杜  
注狐厨受鐸昆都晉三邑平陽臨汾縣西北有

狐谷亭汾水出太原南入河今平陽府城西北  
有狐谷亭孔氏以為即狐厨邑又府南有昆都聚  
或引安邑昆  
吾鄉太遠非

受鐸

見上

昆都

見上

汾

見上臣謹按今汾水出太原府靜樂縣北百四  
十里管涔山西流經府城西太原縣城東折而西

經清源縣及文城縣東南又經文水縣南及祁縣西南境而入汾州府平遙縣界經縣西及汾州府東又南經孝義縣東介休縣西而入平陽府霍州靈石縣境又經縣城及霍州之西又南歷汾西縣東及趙城縣洪洞縣西又南經平陽府城西及襄陵縣太平縣之東又南經曲沃縣西境折而西逕絳州南又西歷稷山縣河津縣南至榮河縣北折而入于大河是時狄自西來薄平陽境蓋狐厨受鐸在汾西而昆都則在汾東今平陽府城西二里即逼汾水也昭元年于產曰昔金天氏有裔子曰昧為玄冥師生允格臺駘駘能業其官宣汾洮障大澤以處太原帝用嘉之封諸汾川沈如蓐黃實守其祀今晉主汾而滅之矣由是觀之則臺駘汾神也周威烈王時韓康子居平陽從智伯伐趙也決晉水灌晉陽知伯曰吾今乃知水可以亡入國也魏桓子肘康子康子履桓子之跗蓋謂汾水可

以灌平陽絳水可以灌安邑也舊史云絳水  
可以灌平陽汾水可以灌安邑蓋文之互耳

令狐

僖二十四年晉公子濟河圍令狐入桑泉取白  
衰杜注桑泉在河東解縣西解縣東南有白城

臣謹按文七年晉敗秦于令狐至于劉首關駟  
曰令狐即猗氏也其處猶名狐邨今猗氏縣西十

五里有  
令狐城

桑泉

見上今臨晉縣東南十八里有桑泉城臨晉  
漢解縣地隋開皇十六年置桑泉縣屬蒲州唐

改臨晉今仍之又西魏恭帝嘗改猗氏縣為  
桑泉周明帝復故以猗氏與臨晉相近也

白衰

見上臣謹按竹書紀年秦送重耳圍令狐桑  
泉白衰皆降京相璠曰春秋土地名桑泉白衰

並在解東不言解者秦師未至于解也後漢志河  
東解縣有白城晉文公以為胥臣食邑有卑耳山

在白城西南齊桓公嘗登之白城今在  
解州西北晉解縣在今臨晉縣東南

廬柳

晉師軍于廬柳退軍于郟咎犯與秦晉大夫盟  
于郟杜注解縣西北有郟城臣謹按今猗氏

縣西北有廬柳城

郟

見上臣謹按丈王庶子封于郟詩所謂郟伯勞  
之者也亦曰荀後并于晉成六年晉人謀居故絳

諸大夫皆曰必居郟瑕者也服虔曰郟在解縣東  
鄆道元曰今解故城東北二十四里有郟城在猗

氏故城西北寰宇記城在猗氏縣西南四里皆似  
有誤今在臨晉縣東北十五里晉解縣在今臨晉

東南應劭曰扶風枸邑縣所謂畢原豐郟文之  
昭也郟侯賈伯伐晉是也臣瓚曰汲郡古文晉武

公滅荀以賜大夫原氏黠是為荀叔又云文公城  
荀然則荀當在晉之境內不得在扶風界也瓚說



是

原

僖二十四年趙衰生原同屏括樓嬰杜注原屏樓  
三子之邑 臣謹按原即周襄所賜邑詳周地路

史曰炎帝臣屏翳封屏國趙括采邑當在其處又  
今隰州永和縣南十里有樓山城後周置歸化縣  
隋開皇十八年改曰樓山大業初廢武德初復置  
東和州貞觀初廢入永和縣取縣南樓山為名

屏

上見

樓

上見

緜

僖二十四年介之推隱而死晉侯求之不獲以  
緜上為之田杜注西河介休縣南有地名緜上

九年齊高豎奔晉城緜而置旃定六年宋樂祁如  
臣謹按襄十三年晉侯蒐于緜上以治兵二十

晉趙簡子逆而飲之酒于繇上今介休縣東南二十五里有介山一名介美以介之推得名山南跨靈石西跨沁源盤踞深厚亦名繇山亦名繇上亦曰橫嶺又忌坂在縣西南十二里相傳為子推被焚處也介推祠有五龍水以供祭祀鼓動即泉流聲絕則水竭甚著靈異五龍水蓋亦附會龍蛇之歌焚山事出新序隋末分介休之南境置繇上縣元省入沁源今在沁源縣北八十里其地有繇上關洪武四年置巡司于此

南陽

僖二十五年王與晉陽樊溫原攢茅之田晉于是始啟南陽杜注在晉山南河北故曰南陽文

元年晉使告于諸侯而伐鄭及南陽杜注今河內地臣謹按南陽禹貢覃懷之境周圻內地也文公始受之陽樊諸田詳見周地馬融曰晉地自朝歌以北至中山為東陽朝歌以南至軹為南陽應

劬曰河內殷國也周謂之南陽後又為魏鄭衛三國之地然南陽之名自若綦母恢見魏王曰秦悉塞外之兵與周之衆以臨南陽而兩上黨絕又張儀曰魏絕南陽是也秦屬三川郡項羽立司馬印為殷王王河內尋為河內郡晉分置河內汲二郡魏置懷州自是或為懷州或為河內郡元為懷孟路明為懷慶府今仍之又水經注曰修武故甯亦曰南陽史記魏安釐王四年魏段干子請割南陽予秦以和又秦昭王四十三年白起伐韓取南陽攻太行道絕之劉原父曰修武有古南陽城然則南陽其統名而修武則魏之南陽邑也今修武縣北有南陽故城

**冀**

僖二十五年遷原伯貫于冀又三十年初臼季過冀見卻缺耨其妻盭之敬相待如賓杜註冀晉邑

臣謹按僖二年荀息假道于虞曰冀為不道入自顛軫伐鄭三門冀之既病則亦惟君故杜註冀

國名平陽皮氏縣東北有冀亭蓋地并于虞虞亡而復歸晉也惠公與卻芮為食邑謂之冀芮見僖十年僖二十四年芮欲殺文公秦伯誘而殺之邑入晉三十年其子缺因臼季舉命為卿復與之冀戰國策蘇代說燕王秦下南陽封冀王氏曰封為封陵冀即冀亭矣水經註汾水西逕清原城北又逕冀亭南京相璠曰今河東皮氏有冀亭古冀國所都也皮氏秦縣晉屬平陽郡今為河津縣縣東有冀亭又縣東五里有如賓鄉

被廬

僖二十七年晉侯蒐于被廬以作三軍杜註晉地臣謹按呂覽晉之霸也東伐被廬疑即此

河陽

見周地盟

焦

僖三十年燭之武曰許君焦瑕朝濟而夕設版馬杜註焦瑕晉河外五城之二邑宣二年秦圍焦馬

註晉河外邑昭二十二年晉籍談帥焦瑕溫原之師救王臣謹按括地志陝縣有故焦城周同姓國也後為晉邑晉亡屬魏史記梁襄王五年秦圍我焦曲沃與秦河西之地六年秦取我焦八年秦歸我焦曲沃焦與曲沃地相近也又秦紀惠文王後十一年樗里疾攻魏焦降之東魏武定初高歡使李徽伯刺陝州築壘于此因難足山為址後遂名徽伯壘四年為宇文泰所拔今陝州南二里有焦城水經註上陽虢仲之所都為南虢其大城中有小城古焦國也武王以封神農之後王莽改為黃眉此又一焦

上陽詳見虢地

瑕

傳三十年傳見上文十二年秦復侵晉及瑕十三年晉使詹嘉處瑕以守桃林之塞杜註賜其瑕邑

令帥衆守桃林以備秦成十三年成肅公卒于瑕杜註晉邑臣謹按後漢志解有瑕城京相璠曰

河東解縣西南五里有故瑕城晉地道記猗氏縣  
東北有瑕城劉昭誤引為杜預今臨晉縣東亦有  
瑕城似皆誤以郇瑕為二故相屬言之也今据杜  
氏焦瑕同在河外甚明秦之自河曲夜遁也晉欲  
薄諸河蓋已渡河而西矣既而復侵晉入瑕不過  
擾其邊竟耳必非深入東渡也次年春晉即使詹  
嘉處瑕以守桃林之塞桃林之塞即今潼關外地  
其為河南益無可疑矣晉侯問原守于寺人狄鞮  
對曰昔趙衰以壺飧從徑餒而勿食故使處原凡  
使人守邑而即以壺飧之皆謂之處其與桃林相近  
又可知矣水經註留水出常烝之山北逕曲沃城  
南又屈逕其城西魏司徒崔浩以為曲沃地名春  
秋詹嘉守桃林之塞處此以備秦以曲沃之官守  
之然則瑕即曲沃矣又戰國策每以焦曲沃並舉  
如言焦瑕然斯亦一證唐至德二年廣平王俶出  
關收東京至曲沃即此水經註弘農縣東十三里

有好陽亭又東有曲沃城今陝州西南三十二里有曲沃城西征記云陝州有太原倉北臨大河周遭六里即詹嘉所處之瑕也太原倉隋所置唐裴耀卿運江淮之粟入太原倉復自太原倉入渭輸關中今陝州西南六里有太原倉嫌與焦太近不應數里之間並設二邑當以曲沃之說為優

### 清原

僖三十一年晉蒐于清原作五軍以禦狄杜註河東聞喜縣北有清原臣謹按宣十三年赤

狄伐晉及清杜註清一名清原又成十八年晉逆周子于京師立之大夫逆于清原水經註汾水逕

長修縣故城南修水入之又西逕清原城北故清陽亭也即晉侯蒐處寰宇記安邑縣北五十里有

清原今在稷山縣南  
稷山晉為聞喜縣地

### 殺

僖三十二年秦出師于東門之外蹇叔送之曰晉人禦師必于殺殺有二陵焉其南陵夏后臯之墓

也其北陵文王之所辟風雨也杜註殺在弘農澠池縣西夏后臯夏桀之祖父此道在二殺之間南谷中谷深委曲兩山相嶽故可以辟風雨三十三年晉師及姜戎敗秦于殺臣謹按三嶠山亦曰二嶠或謂之嶠澠或謂之殺塞公羊傳殺之嶽巖殺梁傅殺嶽巖之下水經註曰石嶠山山徑委深峯阜交蔭故可以避風雨也建安中曹公西侵巴漢惡其險更開北山高道括地志東嶠山俗亦號丈王山在夏后臯墓北可十里許有回谿阪行者畏之曹公開北道後行旅皆由于此晉魏以來莫之或改北周復從南道隋大業初建東京廢二殺道開夔卅道夔卅道即北道也大約出潼關歷陝州入永寧界分為二道東南入福昌縣界即南道東北入澠池縣界即北道也元和志自東嶠至西嶠長三十五里東嶠長阪數里峻絕澗車不得方軌西嶠純是石阪十二里險不異東嶠即此秦



師伐晉之道其道在南故杜曰南谷中也東漢馮異大破赤眉於穀底即此澠池漢縣屬弘農郡晉因之今峭山在永寧縣北六十里漢晉澠池之西境也魏太和十一年于其地置峭縣隋省入熊耳武德初復置屬函州改屬陝州後移治硤石塢改名硤石而舊峭縣廢為石礫鎮水經註峭水出河南于峭之山其水北流纏絡二道水上有梁謂之鳴橋歷澗水東北流與石峭水合又北亂流入于河

箕

僖三十三年晉人敗狄于箕杜註太原陽邑縣南有箕城臣謹按昭二十二年叔孫婁如晉士伯曰將館子于都乃館諸箕杜註都別都謂箕邑陽邑漢縣屬太原郡晉因之隋改太谷今仍之屬太原府縣東三十

五里有箕城

# 先茅之縣

信三十三年以先茅之縣賞胥臣杜註先茅絕後故取其縣以賞胥臣臣謹按先

茅之縣猶言蘇忿生之田也

# 王官

文三年秦伯伐晉取王官及郊杜註晉地臣謹按成十三年晉侯使呂相絕秦曰俘我王官

即此水經註涑水過左邑又西逕王官城北原上人謂為王城也城冢記在虞鄉南二里虞鄉魏縣

元省入臨晉今在臨晉縣南六十里縣東南有王官谷志云以王官廢壘為名在中條山有天柱跨

鶴諸峯瀑布貽溪諸水唐末司空圖隱此唐裴駘註史記王官在澄城括地志猗氏縣南二里有

王官故城又澄城縣西北九十里有王官城北十七里有北郊西郊城按正義曰時秦地東至河在

猗氏者為是蓋自韓原戰後秦已征晉河東置官司矣本傳上云濟河焚舟下云自茅津濟所取之

地在河東無  
疑裴駟誤也

郊

見上臣謹按史記秦本紀穆公三十六年使孟明伐晉渡河焚船取王官及鄣徐廣曰左傳作郊

正義曰鄣音郊其地當  
為臨晉平陽間小邑

茅津

晉人不出遂自茅津濟封殺尸而還杜註茅津在河東大陽縣西臣謹按大陽漢縣以在大

河之陽而名屬河東郡魏晉因之唐改平陸今仍之屬解州縣東南有茅城春秋晉邑亦曰茅亭河水經其南即茅津也河之南為陝州州治距河三里乃黃河津濟處亦謂之大陽津又為陝津公羊傳晉敗入大陽史記秦穆公元年自將伐茅津勝之後漢書鄧禹圍安邑更始將樊參渡大陽鄧禹擊斬之興平二年獻帝自曹陽至陝夜潛渡河僅到大陽皆此津也唐貞觀十一年于茅津造浮梁

曰大陽橋長七十六丈廣二丈架大河之上尋廢  
今亦曰大陽關蓋東則富平津西則大陽津實大

河之衝

要也

甯

文五年晉陽處父聘于衛反過甯杜註甯晉邑汲  
郡修武縣也定元年魏獻子卒于甯 臣謹按韓

詩外傳武王伐紂勒兵于甯因曰修武徐廣王隱  
以為秦并天下而改者非也春秋時仍為甯邑秦

昭王十六年司馬錯攻魏取軹及鄧或曰鄧當作  
甯又戰國策秦攻魏取寧邑亦即甯也信陵君曰

通韓上黨于共甯韓非說秦昭王越長平西伐修  
武蓋甯與修武通稱矣漢高祖封功臣魏邀為甯

侯漢二年軍于修武尋置修武縣屬河內郡晉屬  
汲郡隋屬懷州唐改屬殷州尋如故宋省復置今

屬懷

慶府

夷

文六年晉蒐于夷夷見周地改蒐于董杜註河東汾陰縣有董亭臣謹按宣十二年厨武子曰

董澤之蒲杜註聞喜縣東北有董池陂實為二地然後漢志臨汾有董亭與杜不合水經註涑水西經董澤陂南即古池東西四里南北三里春秋文公六年蒐于董澤即斯澤也今聞喜縣東北三十里有董氏陂中產楊柳可以為箭又名秦龍池即舜封董氏秦龍之所其地出泉民引以溉田流入涑水晉汾陰今榮河縣董亭無考疑為一地

董

見上

郟

文六年晉賈季迎公子樂于陳趙孟使殺諸郟杜註晉地臣謹按襄二十三年齊侯伐晉取朝歌

入孟門登太行張武軍于熒庭成郟郟杜註取晉邑而戍之即此郟也後漢志垣有郟亭劉昭引博

物記云垣縣有郟邵之阨晉殺公子樂于郟邵孔穎達亦曰垣縣有郟亭蓋三名為通稱矣宋白曰其地即周召分陝之所又有召公祠在垣縣東六十里古棠樹下魏于此置郟郡垣縣今垣曲縣地

縣東有

郟亭

### 陽

文六年晉殺其大夫陽處父漢陽邑縣是也隋改太谷今太谷縣東南十五里有陽邑縣

### 董陰

文七年趙盾禦秦師于董陰八年先克奪蒯得田于董陰杜註晉地

### 剗首

文七年晉敗秦師于令狐至于剗首杜註令狐在河東當與剗首相近臣謹按水經註漢水

在郟陽城南與剗首水相近亦謂之剗首坑杜佑通典郟陽有剗首水當時士會于此奔秦令狐在

倚氏距此

不遠也

武城

文八年秦人伐晉取武城  
臣謹按史記秦厲  
公二十一年晉取武城  
魏文侯三十八年伐秦

敗我武下即武城下也  
漢置武城縣屬左馮翊後  
漢廢或謂之武平城亦謂之光武城相傳光武征

隗囂曾  
駐于此

北徵

文十年秦伐晉取北徵  
臣謹按路史北徵古  
鄗國漢置徵縣漢溝洫志武帝穿渠自徵引洛

即此東漢省後魏改置澄城縣于今治顏氏曰北  
徵今澄城縣王蒼曰徵音懲一曰張里反韋氏曰

徵澄同音後人訛為澄也  
隋屬同州五代梁嘗  
屬河中府今如故北徵故城在縣南二十二里

河曲

文十二年晉人秦人戰于河曲  
杜註河曲在河  
東蒲坂縣南  
臣謹按後漢書蒲坂有沙丘亭

劉昭曰即河曲湯伐桀孔安國以為河曲之南即  
此竹書紀年晉惠公十五年秦穆公送公子重耳

涉自河曲水經註曰左傳僖二十四年秦伯納之  
及河子犯以璧授公子曰臣負羈紕從君于天下  
臣罪多矣請從此亡公子曰所不與舅氏同心者  
有如白水投璧于此水經云河水南至華陰潼關  
渭水自西來會之蓋河水自此折而東故謂之河  
曲也杜佑通典秦晉戰于河曲即蒲坂也戰國時  
魏地史記秦昭襄王四年取魏蒲坂五年魏朝臨  
晉復與魏蒲坂十七年秦以垣易蒲坂皮氏漢曰  
蒲反縣河東郡治此應劭曰蒲秦始皇東巡見長  
阪故加坂也孟康曰晉文公以賂秦秦人還蒲于  
魏魏人喜曰蒲反矣故曰蒲反也是則蒲坂之始  
又嘗為蒲也重耳居蒲為蒲子與此又別後漢為  
蒲坂縣晉因之隋為蒲州治尋折置河東縣大  
業初以蒲坂并入今故城在蒲州東南五里

**羈馬**

秦伯伐晉取羈馬杜註晉地臣謹按呂相絕  
秦所云入我河曲伐我涑川俘我王官剪我羈



馬即此也杜佑通典曰邵陽有羈馬城非也呂相  
明云已入河曲而後伐閻喜之凍川俘臨晉之王  
官以及于羈馬在河東明矣近志今蒲  
州南三十六里有羈馬城亦謂之涉丘

瑕

前見

桃林之塞

文十三年晉使詹嘉處瑕以守桃林之塞  
杜註桃林在弘農華陰縣東潼關臣謹

按後漢志曰弘農有桃丘聚故桃林博物記曰桃  
林之塞在湖縣休與之山水經註湖水出桃林塞  
之夸父山武王歸馬華陽放牛桃林即此也其中  
多野馬造父于此得驂騮耳盜驪之乘以獻周  
穆王潼關古亦稱桃林塞水經註河在關內南流  
衝激關山因謂之潼關晉所謂桃林之塞秦所謂  
楊華也又西有潼水東北流注于河河自潼關東  
北流水側有長坂謂之黃卷阪潘岳西征賦所云

沂黃卷以濟潼也潼關之名自魏武西征馬超始見于史今在華州華陰縣東四十里漢弘農縣今靈寶漢湖縣今閿鄉也三秦記曰桃林長安東四百里考潼關去長安東三百里更加百里則為閿鄉之境元和志曰號之閿鄉東南十里有桃原武王放牛桃林之處陝之靈寶又有桃林塞在焉蓋秦中自華而號自號而陝而河南中間千里古立關塞有三在華陰者潼關也自潼關東二百里至陝州靈寶縣則秦函谷關也自靈寶縣東三百餘里至河南府新安縣則漢函谷關也王氏曰自靈寶以西潼關以東皆曰桃林自崤山以西潼津以南通稱函谷然則桃林函谷同實異名新安漢關揚僕所移與桃林無與秦關以西皆詹父所守矣隋分弘農縣地置桃林縣天寶初得寶符于古函谷故關旁改名靈寶括地志函谷故關在陝州桃林縣南十一里有關城在谷中深險如玉因名其

中劣通東西十五里絕岸壁立其上栢林蔭谷中  
荀卿謂之松栢之塞林氏曰春秋時靖函晉有也  
故能以制秦秦得靖函而六國之亡始兆矣賈生  
曰秦孝公據靖函之固孝公始置闢自前則但謂  
之桃林也今靈  
寶西有桃林寨

諸浮

文十三年六卿相見  
于諸浮杜註晉地

黃父

文十七年晉侯蒐于黃父杜註一名黑壤晉地  
宣七年會于黑壤傳盟于黃父杜註黃父即黑

壤

臣謹按昭二十五年會于黃父即此黑壤山  
在澤州沁水縣西北四十里後周宇文泰小字黑

獺諱之改為烏嶺唐會昌三年晉絳行營節度使  
石雄討劉稹敗之烏嶺即此李德裕曰烏嶺距上

黨百五十里亦曰黑山澮水出焉或云  
在絳之東今烏嶺與平陽府翼城接界

陰地

宣二年趙盾自陰地率諸侯之師以侵鄭杜註陰地晉河南山北自上洛以東至陸渾臣謹

按哀四年蠻子赤奔晉陰地杜註亦同晉上洛今西安府洛南縣陸渾今河南府嵩縣其地南阻終南北臨大河所謂河南山北也或曰晉有陰地之命大夫命大夫別于縣監尹也今盧氏縣有陰地城即命大夫屯戍之所猶夫南陽為河內之摠名而別有南陽城則在修武也

首山

宣二年趙宣子田于首山舍于翳桑杜註翳桑桑之多蔭翳者首山在河東蒲坂縣東南臣

謹按首山即首陽山也在今蒲州東南山海經曰和山實惟河之九都五曲九水出焉吉神泰逢司之居於萑山之陽呂氏春秋夏孔甲田于東陽萑山帝王世紀曰即首陽山也山有九名曰歷山曰首山曰薄山曰襄山曰甘棗山曰渠豬山曰獨頭山曰陟山曰雷首山禹貢所謂壺口雷首至于太

岳尚書大傳湯放桀升自陟皆此也開山圖首陽  
與華岳本一山當黃河巨靈胡開為兩山今壁處  
手足之跡猶存絳州西北九里有哺  
饑坂相傳即趙盾食翳桑饑人靈輒處

### 桃園

宣二年趙穿弑靈  
公于桃園考闕

### 邢丘

宣六年赤狄伐晉圍懷及邢丘杜註邢丘今河  
內平臯縣臣謹按韓詩外傳武王伐紂至邢

丘襄八年晉會諸侯于邢丘昭五年子產相鄭伯  
會晉侯于邢丘戰國策范雎說秦攻邢丘邢丘拔  
而魏請附史記韓昭侯六年伐東周取邢丘秦昭  
王四十一年攻魏取邢丘懷又秦始皇五年蒙驁  
伐魏拔邢丘信陵君上魏安釐王書秦固有懷茅  
邢丘安城境津以臨河內即此邢丘也竹書梁惠  
成王三年鄭城邢丘鄭即韓也或謂之韓臯趙悼  
襄王二年城韓臯漢置平臯縣屬河內郡應劭曰

平臯縣有邢丘是也晉因之後魏屬武德郡北齊廢有平臯陂周圍二十五里多產芡蒲民賴其利陂南即大河矣今平臯故城在懷慶府東南七十里懷見周地

向陰 宣七年赤狄伐晉取向陰之禾 見周地

黑壤 見黃父

董澤 見董

清 見清源

曲梁 宣十五年晉荀林父敗赤狄于曲梁杜註曲梁今廣平曲梁縣 臣謹按襄三年諸侯同盟于

雞澤晉侯之弟揚于亂行于曲梁魏絳戮其僕杜註雞澤在廣平曲梁縣西南即此曲梁也杜佑曰

曲梁在春秋為赤狄之地荀林父敗狄于曲梁遂滅潞漢為曲梁縣屬廣平國水經註洺水經曲梁城是也宣帝封平于頃王子敬為侯邑後漢屬魏郡晉為廣平郡治北齊省入廣平縣隋移廣平于今府治改縣曰永年今仍之曲梁故城在府東北又後漢志曲梁侯國有雞澤雞澤即諸侯同盟處也酈道元曰漳水東為渚澤曲梁縣之雞澤也國語所謂雞丘矣今在府西若今雞澤縣乃隋析廣平縣所置非古雞澤也又後漢志潞縣註云荀林父伐曲梁在城西十里今名石梁此誤也漢潞縣乃潞子嬰兒之國都今為潞城縣曲梁則潞之邊境耳荀林父先披其旁邑而後及其國都無容混為一地也

輔氏

宣十五年秦伐晉次于輔氏晉侯治兵于稷以略狄土立黎侯而還及雒魏顆敗秦師于輔氏

獲杜回杜註輔氏雖稷皆晉地河東聞喜縣西有  
稷山臣謹按襄十一年秦伐晉濟自輔氏即此  
今朝邑縣西北十  
三里有輔氏城

春秋地名攷畧卷四



欽定四庫全書

春秋地名攷畧卷五

詹事府詹事高士奇撰

晉下

稷

見上臣謹按杜註又云晉時新破狄土地未安

權秦師之弱故別遣魏顆距秦而東行定狄地後

漢志聞喜縣有稷山亭劉昭曰在縣西五十里隋置稷山縣唐屬絳州至今因之今縣南五十里有

稷神山水經注山下有稷亭即晉侯治兵處也山東西二十里南北三十里高十三里相傳為后稷

始播穀於此

雒見上

瓜衍之縣

宣十五年晉侯賞士伯以瓜衍之縣  
氏曰汾州孝義縣北十里瓜城晉滅虞虢吳

遷其民於此

斷道

宣十七年同盟於斷道杜註晉地傳會于卷楚  
杜注卷楚即斷道吳氏曰今沁州東有斷梁

城三面絕澗廣袤二里水經注斷梁城即銅鞮  
縣之上虎亭又東南有傾城即縣之下虎聚

野王

宣十七年晉人執晏弱于野王杜注野王縣今  
屬河內臣謹按大事紀秦昭王四十五年白

起拔韓野王絕上黨道秦始皇六年拔魏東地置  
東郡衛元君角自濮陽徙居野王以保魏之河內

漢因置野王縣屬河內郡光武初分遣鄧禹入關  
親送之至野王是也晉河內郡治此後魏為懷州

宇文周建德七年如懷州置懷州宮隋改縣為河內唐為懷州治今為懷慶府治

苗賁皇使見晏桓子杜注楚鬪椒之子奔晉食邑于苗地臣謹按襄二十六年聲子謂楚子木曰

若教之亂伯賁之子賁皇奔晉晉人與之苗以為謀主通志云河內軹縣南有苗亭水經注云瀑水

原出王屋西山逕瀑關南歷軹關苗亭西故周之苗邑也又東流注河軹關在今濟源縣南十五里

瀑關一曰箕關在絳州垣曲縣東北七十里

赤棘

成元年盟于赤棘杜注晉地

邢

成二年楚申公巫臣奔晉晉人使為邢大夫杜注晉地臣謹按襄二十六年聲子曰子靈奔晉晉

人與之邢以為謀主襄四年齊國夏伐晉取邢或謂即邢丘或謂衛滅邢國地入于晉邢丘見前邢

國別

梁山

成五年梁山崩杜注山在馮翊夏陽縣北臣謹按公羊傳梁山河上之山也梁山崩壅河三

日不流國語梁山崩晉侯以傳召伯宗遇絳人告以國主山川山崩川竭君為不舉策于上帝國三

日哭以禮焉知山為晉山矣禹貢治梁及岐詩奕奕梁山又即呂梁山也呂氏春秋呂梁未鑿河出

益門之上水經注河水又南經梁山原是也唐十道志關內道名山曰梁山

故絳

成七年晉人謀去故絳諸大夫皆曰必居郇瑕氏之地沃饒而近鹽杜注鹽鹽也猗氏縣鹽池

是也故絳見本卷絳

郇瑕

見上詳本卷瑕

監

見上 臣謹按監鹽池也漢志池在安邑西南許慎謂之鹽池長五十一里廣六里周一百一

十四里呂忱曰宿沙煮海謂之鹽河東鹽池謂之監池紫色澄渟渾而不流水出石鹽自然凝成水

經注鹽水出安邑東南薄山西北流經巫咸山北又逕安邑故城南又西流注於鹽池漢武興鹽鐵

之利天下鹽官二十八郡而河東安邑為首後漢元和三年帝幸安邑觀鹽池建安四年曹操遣謁

者僕射監鹽官以其利招服關中後魏甄琛請弛鹽池之禁以予民唐大歷十八年兩池生乳鹽賜

號靈慶寶應池宋志鹽之類有二引池而化者周官所謂監鹽也煮海煮井煮鹹而成者周官所謂

散鹽也宋分為兩池各置鹽場二明初并為東西二場成化十一年增置中場其池亦分為三近安

邑者為東池近安邑西二十里路村者為中池近解州者西池要之止一池也孔叢子魯人猗頓以

鹽鹽起漢于其地置猗氏縣晉因之其古城在今猗氏縣南二十里鹽池又在其南故杜預以為在

也猗氏

### 新田

不如新田有汾澮以流其惡杜注汾水出太原經絳縣北西南入河澮水出平陽絳縣南西入

汾水自曲沃流入絳州南西入稷山縣澮水有

二源一出翼城縣烏嶺山一出絳縣東北大交鎮俱西流過曲沃縣流入絳州南之王澤合於汾水

汲冢書晉平公齊景公至澮上括地志王澤在州南智伯攻趙趙襄子犇晉陽原過後從至於王澤

即此史記韓世家懿侯九年魏伐我澮竹書紀年晉出公五年澮絕於梁周安王二十四年翟敗魏

師於澮周顯王七年魏敗韓趙之師於澮皆此也亦謂之少水襄二十三年齊侯伐晉成郟邵封少

水蓋封尸為京觀于澮水旁也京相璠曰沁水即少水

澮水

見上

銅鞮

成九年鄭伯如晉執諸銅鞮杜注銅鞮晉別縣在上黨臣謹按襄三十一年子產曰銅鞮之

宮數里昭二十八年滅羊舌氏樂霄為銅鞮大夫蓋晉之別宮亦羊舌赤之食邑也劉昭曰羊舌所

邑在晉宮北二十里漢置銅鞮縣屬上黨郡高帝八年周勃轉攻韓信軍銅鞮破之晉因之魏屬鄉

郡隋屬潞州唐改沁州劉昭曰武德三年銅鞮移於法水堡六年移於今沁州治水經曰銅鞮水出

覆釜山酈氏注云鞮水出銅鞮縣西北石磴山與專池女諫諸水亂流以注於銅鞮今銅鞮故城在

沁州南  
十里

桑田

成十年晉景公召桑田巫杜注桑田晉邑臣謹按僖二年虢公敗戎于桑田虢亡地入晉詳

地虢

交剛

成十二年晉人敗敵於交剛或曰在平陽府隰州畹

保城

成十三年晉使呂相絕秦伐我保城杜注伐保城誣之臣謹按杜氏不言保城何地蓋非地

名不過為完守入保之城也此時秦師越晉之殺以伐鄭故傳曰迭我殺地伐我保城殄滅我費滑孔穎達曰於時輕行襲鄭不得在道用兵故知此伐保城是誣之也是役也晉已邀其歸師擊敗之又欲文致秦罪故言伐我保城猶言焚我郊保耳

涑川

呂相又曰伐我涑川杜注涑水出河東聞喜縣西南至蒲坂縣入河臣謹按水經注曰涑水



出聞喜縣東山黍葭谷酈道元注曰涑水所出俗謂之華谷後周韋孝寬請築城以防齊處也至周陽與洮水合左傳子產曰臺駘者洮之神也司馬彪曰洮出聞喜亦涑水之兼稱矣後周建德四年周主如河東涑川明年克晉州留兵戍守齊人攻晉州急命宇文憲屯涑川以為聲援又水經曰河水南至雷首山西涑水注之註曰水出雷首山一曰雷水穆天子傳天子至于雷首有獻良馬者孔牙受之于雷水之干春秋之涑川也俗謂之陽安澗水按雷首去蒲坂三十里即杜氏所云入河處也近志云涑水出絳縣橫嶺山乾洞伏流盤東地中而復出西流經聞喜縣東合甘泉引為四渠曰東外曰喬寺曰觀底曰蔡薛溉田百二十八頃西流經夏縣界下流入于黃河今蒲州東北二十六里有涑水城即秦所伐之涑川

郅

呂相又云焚我箕郅我是以有輔氏之聚臣謹按今太原府祁縣西七里有郅城或謂之鵠城其

地名高城村蓋音譌考是役秦次于輔氏晉侯方畧踞土遣魏顆禦却之又襄十一年秦伐晉濟自輔氏其為濱河之邑無疑今朝邑有輔氏城其地東接蒲津理可通也即本傳曰利我有狄難入我河縣楚我箕郅芟夷我農功虔劉我邊陲亦未嘗言深入或者但見箕在太谷遂謂郅在祁縣與蒲津相去數百里秦師何由至此乎存之俟考

苦

成十四年苦成叔臣謹按王符曰郿犨采于苦曰苦成路史曰苦成故城在解州鹽池東

苕丘

成十六年晉人執季孫行父舍之于苕丘公羊作招丘

虛

成十七年鄭子駟侵晉虛滑杜注虛滑晉二邑滑故滑國為秦所滅時屬晉後屬周臣謹按今偃

師縣東南有虛城蓋以其近滑而為  
是言未必然也滑即費滑見滑國

台谷

成十八年晉侯師於台谷以救  
宋杜注闕或曰在今澤州境

瓠丘

襄元年晉人以宋五大夫在彭城者寘諸瓠丘  
杜注河東垣縣東南有壺丘臣謹按壺丘即

穀谷之北岸也亦曰陽壺水經注清水東南逕陽  
壺城東又東流注臯落城北寰宇志曰古陽壺城

南臨大河今絳州垣曲縣東南陽壺城是也戰國  
周安王元年秦伐魏至陽壺後魏時曰陽胡魏書

裴慶孫傳邵郡治陽胡城去軹關二百餘里魏主  
修永熙三年將入關使源子恭守陽胡蓋以防高

歡之邀截也西魏以邵郡為重  
鎮與高歡相距蓋亦陽胡矣

長檮

襄三年公及晉侯盟于長檮公至自晉杜注晉  
侯出其國都與公盟于外臣謹按正義曰長

擣蓋近城之地盟訖還入于晉故公歸書至自  
晉本非刻期聚會之所故不得以長擣告也

雞澤

見曲梁

著雍

襄十年晉悼公還自宗及著雍疾杜註晉地  
臣謹按襄十九年晉荀偃歸濟河及著雍病昭

十三年荀吳自著雍侵鮮虞又昭二十一  
年晉使欒盈城著杜注晉邑疑即著雍也

霍人

滅偁陽傳偁陽妘姓也使周內史選其族嗣納  
諸霍人禮也杜註霍晉邑內史掌爵祿廢著者

使選偁陽宗族賢者令居霍以奉妘姓之祀  
謹按霍人有二說孔穎達曰霍是舊國晉獻公滅

之以為晉邑晉以偁陽之罪不合絕祀故歸之天  
子使周內史選其宗族賢者令居晉之霍邑以奉

祀言納諸霍人者此霍邑或稱霍人猶如晉邑謂  
之柏人也劉炫曰霍晉邑人掌邑大夫猶郟邑大

夫聊人統也依此則霍人在今平陽府之霍州此一說也或謂秦漢以來自有霍人縣按周勃傳從高祖擊韓王信于代降下霍人至武泉樊噲傳曰以將軍從攻反者韓王信于代自霍人以徃至雲中與絳侯等共定之索隱曰霍或作霍正義曰霍音瑣又蘇寡反霍人即後人也顏師古曰霍山寡反漢地理志太原郡有後人縣括地志後人故城在代州繁峙縣界今繁峙縣北有後人城此一說也以理斷之兩霍人相去數百里必無合一之理矣周封叔處于霍閔元年晉獻公滅霍後以賜先且居文五年晉霍伯卒魏世家悼子徙治霍是也又獻公滅霍時趙夙為御霍哀公奔齊晉國大旱卜之曰霍太山為祟使趙夙召霍君奉祀晉復禳焉夫晉已邑霍矣又不泯霍祀其所居之地別命曰霍人如直伯柄之後為直人理或然歟今霍州西十六里有霍城若漢之霍人自在代地

不必牽混可也

櫟

襄十一年秦晉戰于櫟杜註櫟晉地臣謹按今陝西臨潼縣北三十里有櫟陽城相傳即晉之櫟

邑非也傳稱是役秦庶長鮑庶長武帥師伐晉以救鄭士魴禦之少秦師而弗設備壬午武濟自輔氏與鮑交伐晉師已丑秦晉戰于櫟晉師敗績然則櫟為河上之邑明矣史記晉悼公十二年秦取我櫟杜氏釋例云櫟蓋在河北此為差近若櫟陽則古驪戎國秦獻公所都且去河絕遠必非此櫟也或謂櫟為范文子之采邑

溴梁

見周地

長子

襄十八年晉執衛行人石買于長子執孫蒯于純留杜註長子純留二縣今皆屬上黨郡臣

謹按長子周初為史辛甲所封邑後歸晉晉分為趙地智伯攻趙趙襄子將出從者曰長子近且城厚完後又屬韓趙世家成侯五年韓與我長子是也漢置長子縣為上黨郡治晉屬上黨郡後為慕容永所都北齊廢隋置寄氏縣尋改長子屬潞州唐以後因之今屬潞安府唐十道圖長子城丹朱所築丹朱堯之長子因名亦名丹朱城

純留

見上 臣謹按純留春秋時潞子國亦赤狄種也宣十六年晉人滅留吁遂為晉邑謂之純留

亦曰余吾趙世家成侯與韓魏分晉君以端氏肅侯立復徙之純留戰國策張儀勸秦伐韓曰斷屯留之道即純留也竹書梁惠成王十二年鄭取屯留尚子尚子即長子秦始皇八年王弟長安君成蟫將軍擊趙反死屯留漢置屯留縣屬上黨郡魏晉以後因之武德五年自霍壁移今治或以為故

城亦兼霍壁之稱今屯留  
縣東南十里有純留城

梗陽

襄十八年中行獻子見梗陽之巫臯杜註梗陽  
晉邑在太原晉陽縣南 臣謹按昭二十八年

魏戊為梗陽大夫史記趙惠文王十一年秦取梗  
陽即此漢為榆次縣地地理志云榆次有梗陽晉

仍之水經注京相璠曰今晉陽縣南四十里有梗  
陽城隋開皇十六年于梗陽故城置清源縣大業

初省入晉陽唐初復置宗因之金嘗置晉州于此  
尋省縣還屬太原府今仍之縣西三里有閻沒墓

即梗陽人有獄魏戊不能斷其人賂魏  
獻子以女樂沒與女寃諫而辭之者也

祁襄

二十一年叔向曰必祁大夫杜註祁大夫祁奚  
也食邑于祁因以為氏祁縣今屬太原 臣謹按

僖十年晉殺丕鄭祁舉及七輿大夫蓋祁邑先以  
處舉後以賜奚昭二十八年晉滅祁氏分為七縣



魏獻子以賈辛為祁大夫漢置祁縣屬太原郡嘗封緇賀為祁侯晉魏因之武帝嘗封李善為祁侯北齊廢隋復置唐初屬太原尋屬并州宋因之金改屬晉州元屬冀寧路今屬太原府路史曰祁縣以近祁藪而得名水經注侯甲水又西北逕祁縣故城南自縣連延西接鄔澤是為祁藪即爾雅所謂昭餘祁矣今藪在縣東七里故祁城在縣東南七里漢縣治此後魏徙今治今曰故縣村亦曰祁城村又東南八里有古祁城志以為晉祁氏之邑也

雍榆

襄二十三年叔孫豹救晉次于雍榆公穀作雍渝杜註雍榆晉地汲郡朝歌縣東有雍城臣

謹按水經註淇水自今宿胥故瀆又東北謂之白溝徑雍榆城南又經其城東又北至頓丘郡邑志黎陽縣有雍城即古雍榆也今雍榆城在濬縣南十八里

孟門

襄二十三年齊侯伐衛遂伐晉取朝歌為二隊入孟門登太行張武軍于熒庭成郟邵封少水

以報平陰之役乃還趙勝帥東陽之師以追之獲晏黷杜註朝歌今屬汲郡二隊分兵為二部孟門

晉隘道太行山在河內郡張武軍謂築壁壘熒庭晉邑成郟邵取晉邑而守之封少水封晉尸于少

水以為京觀東陽晉之山東魏郡廣平以北臣謹按史記齊莊公二年使欒盈間入曲沃為內應

以兵隨之上太行入孟門欒盈敗齊兵還取朝歌孟門即此事也賈逵曰孟門晉隘道或云即太行

之陘口司馬貞謂在朝歌東北蓋以意言之卒未能明其處也今以太行之全勢論之述征記元和

郡縣志皆曰太行首始河內北至幽州凡百嶺連亘十三州之界有八陘第一軹關陘第二太行陘

第三白陘此三陘在河內第四滄口陘對鄴第五井陘第六飛狐陘第七蒲陰陘此三陘在中山第

八軍都陁在幽州合以今日之地軹關陁在濟源  
縣太行陁在懷慶府城北白陁在輝縣輝縣界連  
淇縣淇縣即古朝歌也懷北之陁亦名羊腸坂上  
有天井關元和志太行陁在懷州北濶三步長四  
十里羊腸所經瀑布懸流實為險阻曹孟德詩云  
北上太行山艱哉何嵬嵬羊腸坂詰屈車輪為之  
推即此也八陁隨地異名獨此稱其本號蓋險要  
尤在此也其地則據南北之喉南得之可以制北  
北得之可以制南其形則北高而南下是故由南  
以進常謂之登自北而來常謂之下韓桓惠王十  
年秦擊我于太行上黨降此由南以制北者也秦  
昭王四十四年白起攻太行道絕而韓之野王降  
此由北以制南者也後漢永平十三年登太行幸  
上黨元和二年北登太行山至天井關後魏主嗣  
泰常八年自河內登太行至高都皆由南以上也  
隋仁壽末漢王諒舉兵并州遣其將余公理自太

行下河內唐史朝義據洛陽唐請回紇下太行拔  
懷州靖康元年尼瑪哈長驅下太行入懷州皆自  
北而下也由是言之入孟門入白陘也登太行登  
羊腸阪也吳起謂魏武侯殷紂之國左孟門右太  
行蓋以紂都朝歌太行如屏擁其西北二陘分列  
左右可恃以為固也當時齊莊公好勇喜兵是役  
也不藉友邦之力獨與數十勇士分將六軍輕兵  
深入蓋欲出人不意用竒以制勝也是故既取朝  
歌則分兵為二部一入白陘由朝歌而墮其險阨  
一登太行自河內以瞰其腹心焚庭者即陘庭也  
蓋已直逼晉之國都矣從來晉受諸侯之兵未有  
如此之危迫者成郟鄩二語又言退兵之整暇郟  
鄩在太行之南界接鄭衛戍之以防追襲少水即  
澮水逼近晉都則為京觀以侈武畧也懸軍千里  
出入自如雖有趙勝一擊之卒亦未能大  
創即事以觀而當時地勢如指諸掌矣

太行見上

朝歌見衛地

熒庭見首條

郟郡見前

少水見澮水

東陽見上  
鼓滅之杜註東陽與此同孔穎達曰鼓在鉅鹿

居山之東山東曰朝陽知東陽是寬大之語總謂

晉之山東故為魏郡廣平以北其地戰國時屬衛  
地後屬趙戰國策國子曰兼魏之河南絕趙之東  
陽則趙魏亦危矣又韓非謂應侯絕上黨以臨東

陽則邯鄲口中蠶也史記趙世家惠文王十八年  
王再之衛東陽決河水伐魏氏大潦漳水出王氏  
曰自漢以前東陽大抵為晉太行山東地非有城  
邑也楚漢之間始置東陽郡漢置東陽縣屬清河  
郡後廢隋開皇六年分棗強清平縣地復置東陽  
縣屬貝州十八年改為漳南縣大業十一年竇建  
德起兵漳南既而劉黑闥復舉兵於此唐仍屬貝  
州宋因之至和中省縣為鎮宋白曰漳南以地居  
漳水之南也金人疆域圖歷亭縣有漳南鎮四望  
平坦中有高阜水環其下即漳水也今臨清州恩  
縣西北六十  
里有東陽城

**范**

襄二十四年范宣子曰在周為唐杜氏晉主夏盟  
為范氏杜註杜伯之子隰叔奔晉四世及士會食  
邑于范復為范氏臣謹按晉范邑戰國時為齊  
地孟子自范之齊是也漢置范縣屬東郡晉屬東

平國劉宗屬東平郡後魏為郡治北齊縣廢隋復置屬濟州唐武德二年于縣置范州五年州廢仍屬濟州八年改屬濮州宗以後因之明洪武二十五年縣為河所圯徙今治古范城在縣東南二十五里季氏私考濮州衛地晉不應以封其大夫士氏本居隨范豈其別名耶按曹濮間錯壤甚多齊烏餘以廩丘入晉廩丘亦在范境使非先有晉地叛臣何由附之今范縣東三里有士會墓

鄗

襄二十六年聲子曰雍子奔晉晉人與之鄗以為謀主杜注鄗晉地昭十四年邢侯與雍子爭鄗

田

木門

襄二十七年衛侯之弟鱣出奔晉託于木門不鄉衛國而坐木門大夫勸之仕不可杜註木門

晉邑臣謹按穀梁傳曰織紵邯鄲終身不言衛木門當在邯鄲之境

任

襄三十年鄭羽頡奔晉為任大夫杜註任晉縣今屬廣平郡臣謹按顏師古曰任本晉邑哀四年

齊國夏代晉取任即此也後為趙邑漢因置任縣屬鉅鹿郡晉屬廣平郡劉昫曰晉改置任縣于鉅

鹿郡之南綠縣地其後廢置不一唐武德四年復置于故苑鄉城尋移今治會昌三年討澤潞叛帥

劉稹成德帥王元達次臨洺畧任及堯山景福二年李克用攻叛將李存孝于邢州自藥城進屯任

縣即今縣矣古任城在今任縣東南

大鹵

首見卷

大夏

首見卷

大原

首見卷



洮

昭元年臺駘能業其官宣汾洮杜註汾洮二水名臣謹按後漢志聞喜有洮水水經註洮水經聞

喜縣周陽邑與洮水合洮水東出清野山世謂之清襄山水又西合涑川王莽改左邑曰洮亭然則

涑水亦洮水之兼稱矣一統志洮水出太原府平定州西九十里壽陽西太平谷誤

雍

昭元年鄭伯如晉及雍見雍國

中都

昭二年晉人執陳無宇于中都杜註中都晉邑在西北河界休縣東南臣謹按史記秦本紀惠

文君後九年伐趙取中都西陽安邑六國表趙武靈王十年秦取我中都西陽安邑而趙世家則云

秦取我西都及中陽一事而互異蓋世家誤也史記正義世家註西都即中都中陽即西陽是矣水

經注侯甲水自祁縣西北逕太谷又西北連祁藪又西北逕中都故城南即晉執陳無宇處也又西

合嬰侯水逕鄔縣故城南入鄔陂而歸于汾流括地志中都在汾州平遙縣西元和郡縣志中都故縣在平遙縣西十二里平遙縣漢為平陶縣屬太原郡晉因之漢介休縣亦屬太原郡晉改為界休屬西河國平陶在東界休在西地相連接故杜預云然也今中都古城在汾州府平遙縣西十二里西南至介休五十里再按漢地里志有中都縣後漢志同劉昭注即引晉執陳無字事誤也又徐廣趙世家西都注云秦記年表作中都太原有中都縣夫既知西都為中都之誤而又引漢縣作注亦誤也漢中都縣文帝為代王時都之晉屬太原國元和郡縣志云高齊文宣帝省榆次縣自縣東十里移中都理之隋仍改名榆次見隋地里志今太原府榆次縣東十五里有中都城與界休之中都相去甚遠也此縣晉時猶在如果在介休杜預即當直云今縣如野王長子之例乃云中都在界

休東南便知非一地矣水經注以  
代王都與晉執無宇事連載亦誤

州田

地見周

魏榆

昭八年石言于晉魏榆杜註晉地臣謹按今  
榆次縣西北有榆次故城杜佑曰晉魏榆邑也

服虔曰魏晉地榆州里名後謂之榆次史記秦莊  
襄二年蒙驁攻趙拔榆次取三十七城還定太原  
是也漢置縣於  
此故址猶存

虎祁之宮

昭八年晉築虎祁之宮杜註虎祁地名在  
絳西四十里臨汾水臣謹按昭十三年

晉成虎祁諸侯朝而歸者皆有貳心水經注汾水  
西逕虎祁宮北有故梁截汾水中凡三十柱柱逕  
五尺裁與水平晉平公之故梁也其宮背汾面滄  
西則兩川之交會也竹書晉出公五年滄絕于梁

即是處矣今曲沃縣西四十九里  
有虎祁宮址地連聞喜界

西河

昭十三年樂王鮒謂季孫將與  
子除館于西河杜註西使至河

棘津

昭十七年晉荀吳帥師涉自棘津用牲于雒遂  
滅陸渾杜註河津名臣謹按水經注河水經

東燕故城北則有濟水北來注之有棘津之名亦  
謂之石濟津故南津也春秋僖公二十一年晉將

伐曹假道于衛衛人不許還自南河濟即此也晉  
伐陸渾亦于此渡晉永嘉六年石勒將圖河北濟

自棘津擊破向水于枋頭永和八年戴施救冉智  
于鄴自倉垣徙屯棘津寰宇記云津在汲縣南七

里今其地在  
昨城縣北

黃父

前見

乾侯

昭二十八年公如晉次于乾侯杜註乾侯在魏郡斥丘縣晉境內地臣謹按昭二十九年三

十年三十一年皆書公如晉次于乾侯三十年三十一年皆書公在乾侯及公薨于乾侯

定元年公之喪至自乾侯哀元年齊人衛人會于乾侯皆此也漢為斥丘縣屬魏郡闕駟曰地多斥

鹵故曰斥丘應劭曰有斥丘在其西南也高六年封功臣唐厲為侯國後漢仍為縣晉因之高齊改

置成安縣移于今治今斥丘古城在成安縣東南十三里

鄔

昭二十八年魏獻子為政分祁氏之田以為七縣分羊舌氏之田以為三縣司馬彌牟為鄔大夫賈

辛為祁大夫司馬烏為平陵大夫魏戊為梗陽大夫知徐吾為塗水大夫韓固為馬首大夫孟丙為

孟大夫樂霄為銅鞮大夫趙朝為平陽大夫僚安為楊氏大夫杜註七縣鄔祁平陵梗陽塗水馬首

孟也三縣銅鞮平陽楊氏也鄆太原鄆縣臣謹  
按漢地理志太原郡有鄆縣為司馬彌牟邑水經  
注侯甲水又西合嬰侯之水逕鄆縣故城南即司  
馬彌牟邑也俗亦曰慮水又西北入鄆陂史記曹  
參從韓信擊趙相夏說于鄆東大破之又圍趙別  
將于鄆城中漢鄆縣晉後魏因之北齊廢今故址  
在介休縣東北二十七里志云鄆城歷隋唐至宋  
始圯于水城北接文水東接祁縣境縣東北有鄆  
城泊合中都水注于汾河或謂之萬  
澤隋漢王諒拒楊素于萬澤即此

平陵

見上臣謹按晉平陵邑趙曰大陵亦曰大陸  
史記趙肅侯六年遊大陸至于鹿門又武靈王

十六年遊大陸夢處女鼓瑟而歌劉昭曰大陵即  
大陸也漢置大陸縣屬太原郡晉因之時為南單  
于所居永興初東瀛公騰遣將聶玄擊劉淵于大  
陵後魏遷治于城西南十里故曰受陽隋改為文

水以文谷水得名也宋元豐間因水患徙置南漳  
沱村即今文水縣治水經注汾水過大陵縣東迤  
為鄔澤東西四里南北一十餘里南接鄔漢地里  
志九澤在北并州藪也呂氏春秋謂之大理又曰  
溫洩之澤文水出大陵縣西山文谷東到其縣屈  
南到平陶縣東北入于汾夫鄔亦祁氏邑也大陵  
與相接故謂其先為祁氏邑理可通也今文水縣  
東北二十里有大陵城城邑攷大陵故城周十餘  
里後魏廢  
今為官田

### 塗水

見上杜註塗水太原榆次縣臣謹按漢地理  
志太原郡榆次有涂水鄉晉大夫知徐吾之邑

又後漢書註曰榆次十二州志以為塗陽縣後漢  
及晉因之後魏太平真君中併入晉陽縣尋復置  
北齊省入中都縣尋改置中都于榆次廢縣隋復  
舊名屬并州宋太平興國中嘗為并州治後仍舊

今為榆次縣涂水有二一曰大涂水發源縣東南八縛嶺下西北流至縣東十五里合流村入洞渦水一曰小涂水源出鷹山西流入大涂水水經注涂水出陽邑東北大嶧山涂谷西南與蔣谷水合而入榆次縣或曰大嶧山今在本縣東南界一作大廉山

馬首

見上 臣謹按元和郡縣志馬首故城在壽陽縣東南十五里韓固為馬首大夫即此也漢為

榆次之東境晉置受陽縣屬樂平郡永嘉後省隋改置壽陽縣屬并州唐屢改隸仍還并州宋因之金興定二年屬平定州元屬太原路今屬太原府縣東南十五里有馬首村

孟

見上杜註太原孟縣 臣謹按哀四年齊國夏伐晉取孟即此漢地理志太原郡孟縣晉孟丙邑胡

氏曰陽曲縣有大孟城漢置孟縣蓋本治此後魏時省謂之大祁城其城左右夾澗幽深南面大壑



亦曰狼馬澗隋開皇中置孟縣治焉大業初并入汾陽縣水經註汾水合酸水又南流洛陰水注之洛陰水出洛陰城北逕孟縣故城南春秋孟丙邑也又西逕狼孟城縣故城王莽之狼調也臣謹按元和郡縣志孟本漢舊縣後漢及晉不改在今縣西南陽曲縣東北八十里故孟縣城是也後魏省入石艾縣隋開皇十六年置原仇縣屬遼州因原仇故城為名即今縣是也大業二年改原仇為孟縣寰宇記故孟縣今名黃頭寨今孟縣乃隋初之原仇城也蓋戰國時趙有原仇城隋置縣于此歷唐宋元明至今猶存隋開皇間復分汾陽縣置孟縣大業中廢汾陽即陽曲也此則胡氏所謂大孟城也惟大祁城數語水經注以目狼孟城其中必有一誤今太原府陽曲縣東北八十里有大孟城

平陽

見上杜註平陽平陽縣臣謹按孔穎達曰傳先祁後羊舌故選置大夫之次七縣屬祁氏下

三縣屬羊舌氏且五年傳謂伯石為楊石家語史記謂羊舌赤為銅鞮伯華知楊銅鞮皆羊舌邑平

陽之次在銅鞮楊氏之間知亦羊舌邑也古平陽即堯所都春秋時為晉邑其後韓貞子居此漢為

平陽縣高帝封功臣曹參為侯邑昭帝時度遼將軍范明友亦封此後漢仍為平陽縣曹魏置平陽

郡治焉晉因之後魏移平陽郡治白馬城置晉州于此隋改縣曰臨汾後因而不改今為平陽府治

水經注汾水南逕白馬城又南逕平陽縣故城南晉大夫趙鼂之故邑應劭曰縣在平河之陽堯舜

並都之也竹書晉烈公元年韓武子都平陽魏土地記曰平陽城東十里汾水東原上有小臺臺上

有堯神屋石碑按平水出壺口山一名姑射山在縣東八里

楊氏

見上杜註平陽楊氏縣國伯僑自晉歸周封于楊

臣謹按應劭曰楊侯滅楊以賜羊舌赤

漢置楊縣屬河東郡魏屬平陽郡晉因之後魏改屬永安郡隋屬晉州義寧初改為洪洞縣唐以後

因之水經曰汾水逕楊城東注曰間水出穀遠縣西山西南逕楊縣霍山南又西逕故城北晉大夫

僚公去安之邑也又西流入汾汾水逕楊城西不于東矣魏土地記曰平陽郡治楊縣郡西有汾水

南流是也今洪洞縣東南十八里有古楊城在范東村一名范城叔向所築再按漢書武帝元封

四年上幸太原赦汾陽夏陽太原死罪以下賜三縣及楊氏無出今年租賦師古曰楊氏河東聚邑

名後以為楊縣然則漢時亦有兼稱楊氏者迺代相傳故杜預每稱楊氏耳再按寰宇記以鉅鹿

楊氏為春秋祁氏邑此誤按兩漢地理志鉅鹿有楊氏縣後省入廩陶天寶間改為寧晉羊舌三邑

並 在平陽不應此  
邑 獨在鉅鹿也

汝

昭二十九年晉趙鞅荀寅帥師城汝濱杜註汝濱  
晉所取陸渾地 臣謹按陸渾在今嵩縣汝水源

于魯山  
地相接

適歷

昭三十一年季孫意如會  
晉荀躒于適歷杜註晉地

大陸

定元年魏獻子田于大陸楚馬還卒于寗杜註  
禹貢大陸嫌絕遠疑此田在汲郡吳澤荒蕪之

地 寗今脩武縣近吳澤 臣謹按吳澤陂在脩武  
縣北十里東入獲嘉縣界為太白陂注于清又有

宣王陂亦在縣北十里孔子欲北之趙嘗至此後  
人以孔子嘗追封文宣王而名流合于吳澤陂

平中

定三年鮮虞人敗晉  
師于平中杜註晉地

夏墟見卷首

五氏

定九年齊侯衛侯次于五氏杜註齊侯在五氏將往

助之蓋五氏為晉大夫邯鄲午之私邑衛將助齊

伐之也十年傳晉趙鞅圍衛初衛侯伐邯鄲午于

寒氏及晉圍衛午以徒七十人門于衛西門曰請

報寒氏之役杜註午晉邯鄲大夫寒氏即五氏前

年衛人助齊伐五氏是也

中年定九年晉車千乘在中年衛侯將如五氏過中

疑非也臣謹按齊語桓公築中年以衛諸夏哀

五年晉趙鞅伐衛圍中牟又趙襄子時佛黔以中

次三曰車言

春秋地名攷畧

十九

獻侯徙居中牟又魏欲通平邑中牟之道不成索  
 隱曰此中牟當在河北非鄭之中牟也正義蕩陰  
 縣西五十八里有牟山中牟蓋在其山之側今彰  
 德府湯陰西五十里有中牟城正當衛走邯鄲之  
 道

邯鄲

杜註邯鄲廣平縣也初衛侯伐邯鄲于寒氏  
 臣謹按邯鄲故衛邑後

屬晉定十三年趙鞅殺邯鄲午于趙稷以邯鄲  
 叛上軍司馬籍秦圍之齊侯衛侯伐晉救之哀四

年趙鞅圍邯鄲邯鄲降竹書周安王十六年趙敬  
 侯始都邯鄲史記趙成侯二十一年魏圍我邯鄲

二十二年魏惠王拔我邯鄲二十四年魏歸我邯  
 鄲與盟漳水上說者曰是時趙未都邯鄲也至肅

侯時始都之竹書誤改為敬侯也秦昭襄王四十  
 八年五大夫陵攻趙邯鄲五十年王齮攻邯鄲不

技始皇十八年端和伐趙圍邯鄲城盡取趙地秦  
王之邯鄲置邯鄲郡二世九年章邯破趙軍夷邯  
鄲城郭漢置邯鄲縣高九年封子如意為趙王都  
邯鄲張晏曰邯山名邯盡也後漢亦為趙國治曹  
魏屬廣平國晉及後魏屬廣平郡東魏廢入臨漳  
隋復置屬洺州唐屬磁州宋因之明屬廣平府古  
邯鄲城在今縣  
西南二十里

寒氏

前見

晉陽

見首  
條

河內

定十三年邴意茲曰銳師伐河內杜註今河內  
汲郡臣謹按河內殷虛初為衛都後屬晉漢

為河內郡晉分置汲郡  
治汲縣今為衛輝府治

五鹿

見衛地

百泉

定十五年晉人敗范氏之師于百泉 臣謹按今輝縣西北七里有所謂泉源在左者

門泉通百道衛風所謂泉源在左者也故屬衛定公時已屬晉衛水源於此

棘蒲

哀元年師及齊衛鮮虞伐晉取棘蒲 臣謹按史記趙敬侯六年借兵于楚伐魏取棘蒲漢文

帝三年濟北王興居反遣棘蒲侯柴武擊之應劭曰棘蒲即平棘也顏師古曰功臣表有棘蒲侯陳

武平棘侯林摯則棘蒲平棘非一處矣十三州志平棘本晉之棘蒲戰國時改為平棘亦誤也蓋平

棘本漢縣屬常山郡後漢屬常山國晉遷平棘于棘蒲屬趙國由是遂以平棘名杜佑曰平棘故城

在今縣南三里亦謂之南平棘後漢書光武自薊還中山至于南平棘羣后請上尊號不許即其處



也高齊時趙郡嘗治此隋初郡廢尋為藥州治仍  
改趙郡唐曰趙州歷宗金元間改地名隨復故明  
初以州治平棘縣省入屬真定  
府今趙州城中猶有棘蒲社

菟和

哀四年蠻子赤奔晉陰地楚起豐折與狄戎以  
臨上維左師軍于菟和右師軍于倉野杜註菟

和山在上洛東倉野在上雒縣臣謹按水經注  
丹水自倉野又東歷菟和山又東至商縣上洛春  
秋時晉地竹書晉烈公三年楚人伐南鄙至于上  
洛即此漢置上洛縣至元始廢其地即今商州治  
也丹水在城南一里呂氏春秋所謂堯有  
丹水之戰者也州南百四十里有倉野聚

倉野

見上

臨

趙稷奔臨杜註晉邑臣謹按今真定府  
臨城縣東有古臨城即春秋時之臨邑

樂

哀四年齊國夏伐晉取邢任樂高逆時陰人孟壺口會鮮虞納荀完于柏人杜氏樂至壺口註八邑

晉地也樂在平棘縣西北臣謹按樂春秋時晉樂武子封邑其後南徙號曰南緣漢有南緣縣屬

鉅鹿郡其地在今柏鄉縣東北十里漢又于樂故地置關縣屬常山郡建武中以張况為常山關長

即常山郡關邑長矣尋改曰關城後漢改置樂城縣三國魏廢隋開皇十六年復置屬樂州大業中

屬趙郡唐屬趙州元大歷三年屬鎮州天祐初更名樂氏尋復故今屬真定府括地志漢改置樂城

縣在關縣故城西北四十五里後魏太和十九年復于故關城置樂城縣南緣歷晉魏廢置不一北

廢齊

高

見上杜註高即高邑縣也臣謹按高晉邑戰國策周顯王十二年韓趙會于鄆又趙武靈王曰中

山侵掠吾地引水圍鄆是也史記趙世家武靈王  
三年城鄆又孝成王十三年燕將栗腹將而攻鄆  
廉頗破殺之漢置鄆縣屬常山郡武帝封敬肅王  
子丹為侯邑師古曰鄆讀若郭更始二年世祖擊  
斬王郎將李愷于鄆三年世祖自薊南還羣臣勸  
進因即位于鄆南更名曰高邑是也晉屬趙國後  
魏屬趙郡北齊天保六年移治于房子縣東北去  
舊城三十里即今高邑縣也古鄆城在今柏鄉縣

北十  
二里

逆時

見上

郭南枉渚迴

謹按水經注

濡水出蒲陰縣

西昌安

後為趙邑秦置縣

漢封陳平為曲逆侯

張晏曰濡

齊國夏伐晉取曲逆是也

是直以逆時為曲逆矣

水于城曲而西流故曰曲逆後為縣屬中山國後  
漢章帝巡北岳醜其名改曰蒲陰晉屬中山國後

乙二二二二二二

春秋地名攷畧

三

魏屬北平郡北齊省入北平縣隋開皇六年復置蒲陰縣大業初又廢今其地在完縣東南二十里

陰人考

關

壺口

見上杜註潞縣有壺口關臣謹按漢志上黨郡有壺口關建安八年并州刺史高幹聞曹操

討烏桓復舉兵并州守壺口關十一年操圍壺口壺關降是也亦名崢口圖經壺口東出相州滏口

謂之崢口地形險要自昔為襟喉之地舊志壺關山在壺關縣西北二里今在潞安府城東南十三

里延袤百餘里東接相州山形險狹形如壺口漢壺關縣為上黨郡治後魏移縣治于潁陽崗上隋

改置上黨縣於此明初省入潞州嘉靖八年升潞州為潞安府復設長治縣為附郭

柏人

見上杜註晉邑今趙國柏人縣也臣謹按哀五年晉圍柏人范氏臣張柳朔死于柏人史記

趙王遷元年城柏人因置柏人縣屬趙國高祖八年擊韓王信餘寇過趙王張敖相貫高等以帝數嫚罵謀為亂帝還過柏人欲宿心動問縣何名曰柏人帝曰柏人者迫于人也不宿而去光武初破王郎將李音于柏人晉因之建興三年石勒自襄國襲王浚于幽州以火宵行至柏人魏主宏太和八年南巡謀遷都羣臣或請都鄴魏主曰鄴有枉人山東有列人城北有柏人城君子不飲盜泉惡其名也蓋亦以柏人為迫人矣皇甫謐曰柏人城堯所都也魏屬趙郡高齊改縣曰柏仁隋屬邢州唐武德初置東龍州四年州廢改屬趙州貞觀初還屬邢天寶初改為堯山縣宋因之宋熙寧六年廢元祐初復置金改唐山縣今仍之屬順德府柏人故城在縣西十二里


冠氏

哀十五年齊伐晉取冠氏杜註冠氏陽平館陶縣臣謹按冠氏晉邑漢于其地置館陶縣屬

春秋地名攷畧

魏郡三國魏屬陽平郡晉因之隋開皇六年分館陶東界析置冠氏縣屬魏州唐初屬毛州貞觀初仍屬魏州宋屬大名府元屬東平路至元六年升為冠州明初降為縣屬東昌府冠氏古城在縣北

英丘 哀二十二年荀瑤伐齊曰齊攻我英丘君命瑤治英丘也杜註治齊取英丘



春秋地名攷畧卷五